

SAN PABLO KARTA NYAFXTE FXI'JNI KORINTO ÇXHABTEWE'SX JÏI

*Korintotewe'sx Dxus yakh fxi'zesawe'sxtxi
Pablo fxi'jni*

¹ Adxa' Pablo yaaseth, Dxus peeygãhçxa pa'yate Jesukristo jxkaahnisa. Txã'wẽ yũuwa'ja's Dxusku txhitxhçxa nvxiht. ² Korinto çxhabte yakthë'jwe'sxtxi weçxana fxi'jaçthu, txã'wẽy yakthë'j Sosteneswa yuwe weçxaakaja'k. I'kwe'sxa' Kristo Jesus yakh txutemée fxi'zeya' utxaapa'ga Dxus luuçxi'kwe. Majũwe'sxwa kwe'sxtxi jxpe'jsa Jesukristo yasena kxsussa ũstxna txãawe'sx yã'jçxa ja'daçxah txajx tasxte yuuçxáa fxi'zekahnku Dxusa' pa'ya. Txãa Jesukristo' kwe'sx jxukaysatx jxpe'jsa'. ³ I'kwe'sxtxi' Dxusa' pu'çxhina vxite' kwe'sxtxi jxpe'jsa Jesukristowa. Txãa pa'ga Dxus yakhçxáa mfxi'zewe.

*Jesukristo pu'çxpa'ga Dxusa' kïh yuhwa pee-
jxmée jxukak pees*

⁴ Dxusa's weçxana nesthu yu' i'kwe'sx pa'gate, txã'wẽ Dxusa' i'kwe'sxtxi peeygãhçxa kïh yuhwa peejxmée jxukak pees Jesukristo pu'çxpa'ga. ⁵ Txã'wẽ Kristo yakh fxi'zeya' utxaapa'ga, Dxusa' txajx dxi'pte kïhtewa jxuka i'kwe'sx sxiigmée fxi'zewa'ja's jxukak ũs, Dxus yuwe's pta'sxwa'j ma'k yuu, meeçxa' maa isa pta'sxsatewa jiyuwa'j

ma'k yuu nawa jxuka. ⁶ Txãa pa'ga Kristo kaapiya'jni's i'kwe'sx ũuste kaavxya'ja'ikwe. ⁷ Txã'wê Dxus pu'çxte', i'kwe'sxa' kîhte yuhwa sxiigmée i'kwe txajx dxi'pte fxi'ze' Jesukristo kîiwa'j ena's ũyhasna. ⁸ Dxusa' txã'wê ewçxáa jxpe'jna nes yuuna nmeh entepkaçx, kxah Jesukristo kîi ente' i'kwe'sxa' kîhte yuhwa yuwemeesa yuune'kwe. ⁹ Dxusa' na'wê ewçxáa jxpe'jya' neeyũuk na' kxtey yuuna. Txã'wê ewçxáa jxpe'jya' íçxáak txajx Nçxi'k Jesukristo yakh fxi'zeya' pa'ya i'kwe'sxtxi'.

Dxus yakh fxi'zesawe'sx puutx puina txuteni

¹⁰ Kwe'sxtxi jxpe'jsa Jesukristo dxi'pte yakhthê'jwe'sxtxi yu'kxpejeçthu, puutx ewteçxah puutx we'weçxa txutemée kxazîi ja'daçxah teeçxsa na'wêçxaçxáa ew yajkxna fxi'zekahn. ¹¹ Kloé yattewe'sxa' adxa's pta'sxtxi txã'wê i'kwe'sxa' puina fxi'zena ũsta' jîna, txãa pa'gath adx yakhthê'jwe'sxtxi txã'wê we'we'. ¹² I'kwe'sxa' teeçxsa na'wêçxah fxiyfxiy we'wena ũsi'kwe: Maaií yu', adxa' Pablo yakh u'jsath, naapkaçxha' vxite' Apolos yakh u'jsath. Vxite' Pedro yakh u'jsath, açá' vxiteii yu' Kristo yakh u'jsath jîna i'kwe we'we'. ¹³ Nawa Kristo' çteeçx ahtewe'sx yakhçxáa fxi'zewa'jsaga yuuá'? çI'kwe'sx pa'gate Pabloga kluuste uuá'? Meeçxawa ç'i'kwe'sxa' Pablo yase's kxsusçxakwe yu'te bautisâyni yuuá'? ¹⁴ Ewçxáa ne'tka i'kwe'sxtxi maa yuhtxwa yu'te bautisâynee, naasáa Krispo vxite' Gayo txãawe'sxçxáatxthu bautisây. ¹⁵ Txãa pa'ga kim yuhwa txã'wê Pablo yase's kxsusçxa bautisâyñith jîya'

ãjameetxna. ¹⁶ Vxite' Estefxanaswe'sxçxáatxthu bautisãy, meeçxa' vxitetx bautisãy wá'ntka nawa txãa yuutxi' yaaki'çmeeth. ¹⁷ Kristo' adxa's bautisãyya' kaahme', naasáa kwe'sx ewte neeyũuwa'ja's pta'sxya'çxáak kaah. Nawa naa kiwetewe'sxa's jiyunisa yakhméek pta'sxkaah. Txã'wẽme', Kristo kluuste uuni's pta'sxnisa' e'skhẽ neeyũuwe'sxte.

Nwe'wewa' ajawa'ja's Dxus pheujçxa nvxiit-nisa

¹⁸ Kristo' kwe'sx pa'gate kluuste uuk jĩna pta'sxni' kĩhwa seelpimeesa na'wẽ ne' pthũuse' vxituçxa nxus kiwete u'jwa'jsatxi'. Nawa Dxus yakh ũsya' u'jwa'jsa kwe'sx yuutxi' txã'wẽ pta'sxni' seena' wala seelpisa', kwe'sxtxi ewte nvxiitwa'jsa' naa pa'ga. ¹⁹ Dxus librute we'weçxa':

Ivxiitu'nja naa kiwetewe'sxçxá's jiyuni's,
Sa' naa kiwetewe'sxçxá's jiyuni's kĩhte yuhwa
selpiiwa'jmée nvxiitu'nja jĩ'k.

²⁰ Txã'wẽ' aça' naa kiwetewe'sxçxá's jiyuni' ¿kĩhte selpiikx? Kĩhtewa jxuka jiisa kaapiya'jsatha'w sũhsa' ¿mtee yuutxki? Naa kiwete kĩh ũsna txã'sna jxuka jiisathẽ'j ¿kĩh yuukx? Açha' txã' ¿kĩhteçxá' selpiima'k? Naa kiwetewe'sxçxá's jiyunisa's kĩhtewa seelpimeek vxit Dxusa'. ²¹ Dxusa' jiyuk naa kiwetewe'sxçxá's jxuka jiyusa' Dxusa's jiyuya' ajawa'jmeesatewa. Txãasak kĩhtewa jiimeeçxawa txã'sna ũusuh jxuka yajkçxa txajx pta'sxni's wa'lmée jxpa'gateçxáa nwe'wewa'ja's vxit, makwe txajx pta'sxni' vxite yakh yu' seelpimée na'wẽtewa.

²² Judiuwe'sxa' cielujũ seena'sa
 kaavxya'ja'jni'stxi uy wēje', naapkaçxha'
 griegowe'sxa' naa kiwete jiyunisa'stxi pakwé'.
²³ Nawa kwe'sxa' Kristo's kluuskhē ki'pçxa
 ikhniçxá'stha'w pta'sxi'. Judiuwe'sxa' txã'wē
 pta'sxni'stxi jxpuba', naapkaçxha' griegowe'sx
 yuutxi'sa' kīhtewa seelpimée luuku we'weni
 na'wē ne' pthūuse'. ²⁴ Nawa Dxus txhitxhnisa
 judiu vxite' griego txãawe'sx yakh yu', Kristo
 yuuçxáa nwe'wewa'jsa', nwe'wewa'ja's Dxus
 pheu'jçxa nvxiitnisa. ²⁵ Naa kiwete nasa jiisa
 ũstxna txãawe'sx yakh yu', Dxus jiimeesa
 na'wēsaçxawa, txãawe'sxte jxthaakwe jiisa'
 Dxusa'. Aça' Dxus çxhãçxhameeçxa ājasamée
 na'wēsaçxawa, nasa naa kiwetewe'sxte
 jxthaakwe çxhãçxhasa'. ²⁶ Yakthē'jwe'sx,
 i'kwe'sxtxi Dxus txhitxhni's mjiiyuwe. I'kwe'sxa'
 naa kiwetewe'sxa's yu' walamée jii i'kwe sa'
 çxhãçxhasawa kuhmée i'kwe, sa' jxtuhthesawa
 kuhmée i'kwe. ²⁷ Txã'wēçxawa i'kwe'sxa' Dxus
 txhitxhnisa i'kwe, i'kwe'sxtxi jiimeesata' jīna
 naa kiwetewe'sx nasa we'we'tx txãawe'sxtxi
 kaythame'jwa'jsa. Sa' txã'wēy naa kiwete nasa
 we'weçxa': Çxhãçxhamée āhmeesata' jī'tx
 txãawe'sxtxiwa kaythame'jwa'jsa. ²⁸ Naa kiwete
 nasa we'weçxa': Kīhtewa seelpimeesata' jīnatx
 açewe'we' txāa açewe'wesatx seelpimeekhē
 nvxiitwa'jsa i'kwe. ²⁹ Txã'wē i'kwe'sxa'
 āhmeekwesatx txhitxhnisa i'kwe na' kim
 yuhwa Dxus dxi'pte iivejçx yajkxna fxi'zeyā'
 ājameene'kwe. ³⁰ Kristo Jesus yakh fxi'zewa'ja's
 Dxusku vxit. Aça' Kristo's jiyuwa'ja'swa Dxus
 iūçxáak vxit. Sa' txāa Kristopa'ga yuuçxáa

kwe'sxa' Dxus dxi'pte ewtetha'w neeyũu, txajx tasxu txutemée fxi'zeya'. ³¹ Txãa pa'ga Dxus yuuçxá's weçxana tuuthe'jwa'ja's Dxus libroute na'wē fxi'jni ũsa': Maawa jiith sũhna jxtuhthe yaakxwēje'ççxa', Dxus yuuçxá's weçxana tuuthe'jwa'ja' jĩ'k.

2

Kristo kluuskhẽ uuk txajx kaapiya'jni's pta'sxni

¹ Yakthẽ'jwe'sx, adxa' Dxus yuwe's kaajiyu'jya' kxtee pa'jçxa', jiisa we'weni seena' zhiçxkwesa yakh pta'sxna pa'jmeeth. ² Kxtee i'kwe'sx yakh ũsçxa', naa kiwetewe'sxa's jiyunisa yakh pta'sxna ũsu'çmeeth, naasáa Jesukristo's kluuskhẽ ki'pçxa ikhniçxá'sthu pta'sxna ũsu'. ³ I'kwe'sx tasxte pa'jçxa', wala jiisa na'wē pa'jmée, wejxwa jiimeesa na'wē ũukhna pa'jçxath Dxus yuwe's i'kwe'sxtxi pta'sx. ⁴ Nawa naa kiwetewe'sxa's jiyunisa yakh we'weçxa i'kwe'sxtxi' knaymeeth. Txã'wē yũumée, wejxwa Dxus pu'çxte txajx Espiritu yakhçxáath kaajiyu'jçxa i'kwe'sxtxi' knay. ⁵ I'kwe'sxa' naa kiwetewe'sxa'sçxáa piyaçxa Dxusa's jiyumée, wejxwa Dxus íçxáa pu'çxte Dxusa's jiyusa yuukahnthu naa kiwete jiyunisa yu'sa' we'wemée.

Dxus pheu'jnitxi' txajx Espiritu yakh íçxáak ya'jiyu'

⁶ Txã'wēçxawa, Dxusna ew yã'j jiisa yakh yu' txã'wē we'weni' seena' yuh jiisa we'wenisata'. Nawa txã'wē we'weni' naa kiwetewe'sxmeeta', sa' naa kiwete ne'jwe'sx skhẽwwa'jsa ũsta'

wala jiisa txãawe'sx we'weniwa meeta',
 7 wejxwa naa kiwe meetey bagaçxte yuhwa
 pçumée kwe'sx ewte neeyũuwa'ja's Dxusa'
 pheu'jçxa ji'phyã'kh yu' kim yuhwa jiyunimeesa
 txã'snatha'w pta'sxi'. 8 Txã'sa' naa kiwete
 ne'jwe'sx kim yuhwa jiyumeeta'. Jiyuwaça',
 kluuskhẽ ki'pçxa ikhwa'jmée ne'ta yu' kwe'sxtxi
 jxpe'jsa cielujũwe'sxa's. 9 Nawa Dxus librute
 fxi'jni ũsyã'kh yu' txã'wẽ jiyuwa'ja'smée, txãa
 pa'ga ne'ta jiyumée. Txajjik na'jĩ':

Dxusna yaakxsawe'sx jii Dxusa' pheu'kh txãa
 pheu'jni's

Kim yuhwa iiuymeeta', sa' iiwẽse'jwa meeta',

Sa' ũusteçxáa yuhwa yaakxni ji'phu'çmeeta' jina
 fxi'jni'.

10 Dxusa' txajx Espiritu yakhku txã'wẽsatx
 kwe'sxtxi kaajiyu'j, txãa pa'gatey txajx Espiritu'
 Dxus pheu'jni kim yuhwa jiyuwa'jmeesa
 ũstxna txãatx jxuka jiisa'. 11 Ayga nasaa
 pwe'sxçxáa yuhwa ¿kim jiyuya' ajakx vxitee
 ũus yaakxni's? Naasáa txã'wẽ yaakxsayçxáa
 ¿jiyumeema'k? Txã'wẽy Dxus Espiritu yuuçxáa
 jii'a Dxus yajkçxa pheu'jnisatxi'. 12 Kwe'sxa'
 naa kiwetewe'sxa's jiyunisa's jxpa'gaçxa
 ũsmeetha'w. Dxus Espiritu txajx tasxu
 yuusa'stha'w jxpa'ga, Dxus peeygãhçxa kwe'sxtxi
 ew yũuk txãatx jxuka jiyuya'. 13 Txãasatha'w
 kwe'sxtxi Dxus ew yũuni's txajx Espiritu
 kaajiyu'the pta'sxya' aja', sa' naa kiwetewe'sxa's
 piyani's pta'sxi'çmeetha'w. Dxus jĩtxi' Dxus
 Espiritu yakhĩçxáatha'w pta'sxi'.

14 Nawa Dxus Espiritu's ũuste ji'phmeesa' Dxus Espiritu we'weni's jiyuya' ājameetxna. Txã'wěsa yakha' jiimeekwesa we'weni na'wěçxáa pthūsena. Dxus we'wenitxi' Dxus Espiritu yakhçxáa ya'jiyuna, txãa pa'ga Dxus Espiritu yakhmée yu' jiyuya' ājameetxna. Dxus yaakxnitxi' Dxus Espiritu yakhçxáa jiyuya' ājatxna. 15 Nawa maawa Dxus Espiritu's ũuste ji'phsa' jxpubamée ew jiyuya' ājatxna, aç'a txã'wě yūusa's jxpubana ũsa' jīya' ājameetxna maa yuhwa. 16 Txã'wě jiyuya' ājawa'jmeete iŕçxáak Dxus librute na'wě we'we': ¿Kim jiyuya' ājakx Dxus yaakxni's? Dxusa's ¿kim kaapiya'jya' ājakx? jī'k. Txã'wětewa, kwe'sxa' jiitha'w Kristo yaakxni's, Dxus Espiritu kaajiyu'pha'ga.

3

E'zsa Dxus tasxte mjūsaçxáatha'w

1 Yakhthē'jwe'sx, makwe wala jiisa ne'kwe nawa Dxusa's ew jiisa yakh na'wě yu' we'weya' ājameeth, Dxusa's kīh yuhwa jiimeesa yakh na'wěçxáath we'weya' āja. Kristo kaapiya'jni yu's kīh yuhwa jīmée luuçx le'çxkwe na'wěçxáa i'kwe. 2 Luuçx le'çxkwesa's ma'wěta leçxiçxáana puuçu' vxite ũ' yu's puuçmée txã'wěy i'kwe'sxtxi' kaapiya'jçxawa thēymeekuēsaçxáanath kaapiya'jçxa nvxiht, txã'wě thēysa yu'sa' ājameei'kwe naa pa'ga sa' açxpkaçx jiyuya' āja'çmēei'kwe. 3 Txāasa açxpkaçx i'kwe'sx ũuste Dxusa's yu' kīh yuhwa ji'phmēei'kwe, txāasa i'kwe puutx yahçena puina txuteeçxa fxi'ze'. Txã'wě yūunisa',

Dxusa's ũuste ji'phmeesa fxi'zenisa'. ⁴ Txã'wẽ Adxa' Pablo yakh u'jsath jĩçpkaçxha' vxite' Apolos yakh u'jsath jĩna txã'wẽ yũuça', Dxusa's çma'wẽçxáa yuhwa ũuste ji'phmeesa na'wẽ yuh meekwe wakx? ⁵ Ũus miijajkxwe: Pablo' çkĩh yũusaana? Aça' Apoloswa çkĩh yũusaana? Kwe'sxa' naasáa Dxusna selpisaçxáatha'w, Dxus ma'wẽ jxkaathe' txã'wẽy mjĩitha'w teeçxsa na'wẽçxah, txãa pa'ga i'kwe Kristo's jiyuwa'ja's ji'phu. ⁶ Adxa' nyafxte uuhsaçxáath yu', naapkaçxha' Apolosa' yu'awsak yu'. Nawa Dxusku kbuuçxa'jçxa nuywala. ⁷ Txã'wẽ uuhsa vxite' yu'awsa txã'wẽ yũusa' kĩhwa jxtuhthesameeta', naasáa Dxus yuuçxáa jxtuhthesa', txã'wẽ kbuuçxa'jçxa nuywalapa'ga. ⁸ Uuhsa vxite' yu'awsa txãawe'sxa' maa yuhwa jxthaakwesamée, txãa na'wẽçxaçxáata'. Nawa dewewa'j yu'sa' txakweçxaçxáa yu'mée Dxusa' deweena, makwe mjĩite', txã'sçxáan deweena. ⁹ Dxus mjĩinite kwe'sxa' kxtee mjĩisaçxáatha'w, aça' i'kwe'sxa' Dxus mjĩini kiwe na'wẽsa i'kwe.

Txã'wẽy i'kwe'sxa' yat na'wẽsa i'kwe, aça' txãa yata's txahna pheu'jsa' Dxusa'. ¹⁰ Dxus jxkaathe adxa' yat txajxa' jiisa na'wẽ yat txaahwa'ja's kaaçxida'jsaçxáath. Aça' adx takhni kajkwete' vxite mjĩina ũsa' yata's. Nawa ma'wẽ mjĩiwa'ja'swa jxpa'yakx mjĩiwa'j ji'pha' teeçxsa na'wẽçxah. ¹¹ Yat txaahwa'ja's takhna kaaçxida'jni ũsyã'ja' txã' Jesukristo', aça' kim yuhwa vxite fxiy kaaçxida'jwa'j ji'phmeeta'. ¹² Na'wẽ kaaçxida'jni kajkwete kĩh yakhwa mjĩitxna: vxyuu beh, vxyuu çxihme, kwet

zhiçxkwesa yakh meeçxawa fxtüu, çhîçh, khîh txã'wësa yakh. ¹³ Nawa Dxus kastigâywa'j ente ya'pdxî'puçxa ya'jiyuna ma'wë mjîini'swa. Txãa ente' ipx yakh kîijana, aç'a' txãa ipxa' kaajiyu'juna mjîisa ma'wë mjîini'swa. ¹⁴ Txãa kaaçxida'jni kajkwete mjîisa' ew wáa mjîina ipxte çxhavxywa'jmeesa yakh aç'a' txã'wë ew mjîipa'ga dewení yuuna. ¹⁵ Nawa txãa yatte mjîisa' ipxte çxhavxywa'jsa yakh wáa mjîina aç'a' jxuka çxhavxyte', mjîipa'ga dewenimée yuuna. Naasáa kxtee mjîisa yuuçxáa ewte neeyũuna, txãa ipx walajũ ũphna kasehsa na'wë.

¹⁶ I'kwe'sxí Dxus ũswa'j yati'kwe, naa pa'ga Dxus Espiritu i'kwe'sx ũuste u'pwa'jsate ji-imeewá'kwe. ¹⁷ Dxus ũswa'j yata' kîh pkal yuhwa ji'phmeesa na's maawa Dxus ũswa'j yata's ivxiitute', Dxusa' ivxiituna txã'wë yũusa's. Txãa Dxus ũswa'j yata' i'kwe'sxi'kwe.

¹⁸ I'kwe'sxa' maa yuhwa jxpubanuwe, wala jiisatha'w sũhna. Maawa naa kiwetewe'sxa's wala jiisa ũsçxa', jiimeekwesa na'wëçxáa mi-iyajkxwe. Txã'wë yuuçxáa, wala jiisa yuuna pa'jane'kwe. ¹⁹ Naa kiwetewe'sxçxáana wala jiyuni', Dxus dxi'pte' kîh yuhwa seelpimeesa'. Txajíik Dxus librute na'wë we'we': Wala yã'j ji-itha'w sũhna fxi'zesatxi' ewmeete khêewa'ja'sku vxitu' Dxusa', txã'wë yaakxpa'ga. ²⁰ Txã'wëy vxite ajkhêwa na'wë fxi'jni ũsa': Wala jiitha'w sũhna fxi'zeni', kîhte yuhwa seelpimeetewa jiia' Dxusa' jî'k. ²¹ Txãa pa'ga nasaçxáatx jx-thaakwe iiwejçx iiwejçx yajkxna fxi'zewa'jme'. Txã'wë yaakxkahmení kîhwa jxuka i'kwe'sx

jïiçxaçxáata'. ²² Pablo ma'k yuu, Apolos ma'k yuu, Pedro ma'k yuu, naa kiwe ma'k yuu, itxi fxi'zenisa ma'k yuu, uuwa'j ma'k yuu, naa ensu fxi'zeni ma'k yuu, vxite ensu fxi'zewa'j ma'k yuu, nawa txã' jxuka i'kwe'sx jïiçxaçxáata'. ²³ Naapkaçxha' i'kwe'sx yu' Kristo jïi i'kwe, açã' Kristo yu' Dxus jï'.

4

Jesukristo jxkaahnisawe'sx mjïini

¹ Txã'wëyã'the', kwe'sxtxi' naa sũhnaçxáa mfxi'zewe: Kwe'sx ewte neeyũuwa'ja's Dxusa' txãniitey pheu'jçxa ji'phu'k kim yuhwa jiyunimeesa txã'sna pta'sxkahn neewe'weçxa nvxihtte Kristo tasxte selpisaatxna sũhnaçxáa mfxi'zewe. ² Txã'wë mjïiwa'ja's jxpa'gasa' ma'wë mjïiwa'ja'swa jxuka kxtey yuuwa'j ji'pha'. ³ Adx mjïini's i'kwe'sxa' ma'wëwa nuywe'wene'kwe. Nawa i'kwe'sx we'wenitxi' adxa' le'çxkweçxáa yuhwa yaakxwa'j ji'phmeeth. Adxíiçxáa yuhwa adx mjïini' ewa' sũju'çmeeth. ⁴ Nawa adx ũuste yu' ewme' sũhna yu'çme'. Açã' adxa' ew mjïisath jïçxa txã'wë we'weçmeeth. Jesukristo yuuçxáa adx ma'wë mjïisatewa we'wewa'j ji'pha'. ⁵ Txãa pa'ga mjïini's we'wewa'j en ãhmeyna yu', i'kwe'sxa' nuywe'wenuwe. Mũythaswe Jesukristo kihpkaçx. Txãa yuuçxáa ew ma'k yuu ewmëe ma'k yuu nawa kaajiyu'juna makwe jiyunimeesa ũusteçxáa yaakxnisa sũthni yuu ma'k nawa jxuka. Txã'wë yũunijũ ya'jiyuna nasaa iisa ma'wë yũusaaçxawa.

6 Yakthē'jwe'sx, txā'wē nuywe'wena fxi'zeni'sthu yu'kxpeje', Apolos fxi'zeni vxite' adx fxi'zeni txāatx thegçxa txā'wēy fxi'zekahn. Txā'wē yuuçxáa, i'kwe'sxa' jxpubamée fxi'zene'kwe Dxus yuwe ma'wē jxkaathe' txā'sçxáa kxtey yuuna. Sa' kim yuhwa txā'wē teeçxsaçxá's weeçx yajkxna wedxçxa', vxite yu's ahçena fxi'zemeene'kwe. 7 Idxa's çkinga jxthaakwe walasa vxit? Txā'wē Dxus peesnimeesa çkĩhçxá' ji'phga'? Txā'wē kĩhwa jxuka Dxus peesniçxá's ji'phçxa', çma'wēçxaga iuwejçx yaaki', idxçxáa pakweçxa uysáa na'wē?

8 I'kwe'sxa' kĩhwa peejxmée ji'phsa na'wē yā'ji'kwe yaaki'. Kwe'sx yuutxi' e'skhē nvxihtçxa, jxkaahsa na'wē i'kwe yaaki'. Wejxwa jxkaahsaíi yuuwaça' ewna, kxah i'kwe'sx jxkaahnite kwe'sxwa ih ũsya' āja'nja'w sūju'th. 9 Kwe'sxa' Jesus jxkaahnisatha'w nawa Dxusa' nmejkhē ne' nvxiht sūju'th, naasáa ikhwa'j nvxiitnisa na'wēçxáatha'w. Kwe'sx pxthaa yuuçxa uuçte', angeleswe'sx vxite' nasawa thegkahn nasa walaa ksxavxyte nvxiitni na'wē ũstha'w. 10 Kristo kaapiya'jni's pta'sxpa'gaçxáa kwe'sxtxi' kĩhtewa jiimeesa luuku we'wesata' jĩ'tx, naapkaçxha' i'kwe'sx yu' Kristo kaapiya'jni's sxiigmée jxuka jiisa na'wē i'kwe yaaki'. Kwe'sxa' āhmeekwesatha'w, naapkaçxha' i'kwe'sx yu' jxtuhthesa i'kwe. Kwe'sxtxi' açe'tx nasa', nawa i'kwe'sx yuutxi' peeygāja'tx. 11 Āçxpkaçx pxthaa yuunatha'w fxi'ze', nasa ewmée nuywe'weni, wēena, yū'wēena,

athwa'j ropa ji'phméé, yatwa ji'phmeetha'w,
 12 sa' kuseju mjüina wahtxnatha'w fxi'ze'.
 Nasa' kwe'sxtxi wëesxutewa, ewçxáatha'w
 pasu'. Kwe'sxtxi pkxuuna pâpaçtewa,
 wantâyçxa iideewe'çmeetha'w. 13 Kwe'sxtxi
 açewe'weçtewa, ka'tu' peeygâhnatha'w
 yu'kxpeje'. Naa kiwete kxtã' seelpimeesa
 na'wëtha'w fxi'ze', kazxsa's wãataani
 na'wëtha'w yahçena fxi'ze' açxpkaçx.

14 I'kwe'sx thaamekahn txã'wë fxi'jaçmeeth,
 wejxwa adx luuçx wedxnisa na'wë
 yu'kxpehnaçxáath fxi'ja'. 15 Kristo jxkaahni's
 kaapiya'jsa diez mil ma'kwe ji'ph yuu, nawa ney
 na'wësa yu' kuhméé ji'phi'kwe. Txã'wë Kristo
 Jesus yakh fxi'zewa'ja's kaapiya'pha'ga i'kwe'sx
 ney na'wësa' adxthu. 16 Txã'wëth i'kwe'sxtxi
 neewe'we', adx na'wëy fxi'zekahn.

17 Txãasa kajaçthu Timoteo adx nçxi'k wedxni
 na'wësa Kristo yakh txutemée fxi'zesa's. Txã'
 i'kwe'sxtxi kaayaki'jina adx ma'wë ne'tka
 Kristo yakh fxi'ze txã'sna. Sa' txã'wëy
 mteeçxah Dxusa's jiisa pkhaakhena üstxna
 kxsü pekühçxa', ma'wë ne'tka kaapiya'ja'
 txã'snaiçxáa kaayaki'jina. 18 I'kwe'sx maái
 yu' wala çxhâçxha iiwejçx yajxna üsi'kwe,
 Pablo' bagaçx yuhwa pa'jmeena jïna. 19 Nawa
 Dxus ma'wë jxthâaste', dud yuwe'nja puutx
 uyya', txã'wë iiwejçx we'wena üssa kïh
 ma'tx yuu aan çxhâçxha we'wena üsçxa',
 txã'wëy Dxus yakhwa çxhâçxha fxi'zena
 üstxna. 20 Dxus yakh fxi'zenisa' yuwejuçxáa
 iiwejçx we'wena fxi'zenimeesa', wejxwa Dxus

ma'wē jxkaathe', kxtey yuuna fxi'zewa'ja'.
 21 I'kwe'sxtxi adx thegya' pa'jçxa' ¿ma'wēkwe
 yuu jxthâasu'? ¿Peçxuukwe jxthâasukwe',
 meeçxa' peeygâhnakwe pa'j jxthâasu'á'?

5

*Peekx njĩ'j npaasa yakh i'çxáa nyu na'wē
 fxi'zesa*

1 Teeçx i'kwe'sx yakh pkhaakhesa' peekx
 njĩ'j npaasa yakh i'çxáa nyu na'wē fxi'zesa
 ũsa' jĩnik ya'jiyu'. Txã'wē fxi'zeni' pkal
 iiméh wala kazxa'. Dxusa's jiimeesa yuhwa
 txã'wē yu' fxi'ze'çmeeta'. 2 Txã'wē kazx pkal
 yuusa's i'kwe'sx ksxavxyu kutxi'jipkaçxte,
 ewsa'ha'w sũhna iiweeçxwa'jçxá's i'kwe yaaki'.
 3 Adxa' i'kwe'sx yakh ih yu' ũsmeeth, nawa
 adx ũus yaakxni yakh yu' i'kwe'sx yakh ih
 ũsthu. Txãasath txãa piçthē'j ma'wēsatewa
 jiyuçxa', kastigâywa'theyã'j nvxiht, adx ũus
 yaakxni yakhçxáawa. 4 I'kwe'sxa' Jesukristo's
 neewe'weçxa txajx dxi'pte mpuutxwe'wewe
 pkhaakheçxa. Aça' adxwa i'kwe'sx yakh ih
 ũs na'wēyçxáa pu'çxhi'nja, aça' Jesukristowa
 i'kwe'sx yakh ih ũsuna. 5 Txã'wē yũuçxa
 txãa piçthē'ja's eçxthē'j kusete manvxihtwe,
 txajx kakwe' vxitukahn. Nawa txajx ũus yu'
 vxitumeena Jesukristo kii ente'.

6 I'kwe'sxa' txã'wē kazx pkal yuusa's
 kutxi'jmée ũçxa', iiwejçx yajkxna ũswa'j
 ji'phmeei'kwe. Jiimeewá'kwe na'wē we'weni's:
 Lewadura' le'çxkuēeçxawa skuutxh ũ'wete
 jxuka pēetheje'k jĩni's. 7 Lewadura ewmeesa's

mkuutxi'jwe pēethekahmen, kxah i'kwe'sxa' Paskua fxiestate ũ'nisa pan lewadura ji'phmée na'wē yuune'kwe. Txā'wē pkal ji'phmée fxi'zekahnku Kristo' kwe'sx pa'gate uu, txā' kwe'sx Paskuatewe'sx piisxakuēk yu'.⁸ Txā'wēyā'the', kwe'sx ũuste kīh yuhwa ewmeesa ji'phmée Dxusa'sçxáa ũusuh jxuka yajkxna kwe'sx Paskua fxiesta's vxitwa'j ji'ptha'w. Txā'wē ew yajkxna vxitni', pan lewadura ji'phmeesa yakh fxiesta's vxitni na'wēsa'. Nawa ewmée yajkxna Paskua fxiesta's vxitwa'j ji'phmeetha'w. Txā'wē ewmée yajkxna vxitni', lewadura ewmeesa yakh fxiesta's vxitni na'wē'.

⁹ Nyafxíi vxite karta fxi'th txāate' na'wēth yūukaah: Kazx pkal yūuna fxi'zesa yakh pkhaakhenuwe jīnath fxi'j. ¹⁰ Txā'wē kazx pkal yūuna fxi'zesa yakh, vxitee jīitx kusa'j wēesa, pesweesa, dxus ītximeesatx neewe'wesa txāawe'sx yakha' jxukate mtxuteewe peena yu' puutx uymée fxi'zeya' jīçxa txā'wē we'wemeeth. Txāawe'sx yakh puutx uyya'mée txutee wēeçxa', naa kiwejū kasehçxa yuuçxáa txā'wē peena yu' puutx uymeene'kwe. ¹¹ Na'wēth yūukaah txā'sna ne'kwe jiyumée: Maawa yakthē'tha'w jīçxawa, kazx pkal yūuna, vxitee jīitx kusa'j wēesa ma'k yuu, dxus ītximeesatx neewe'wesa ma'k yuu, açewe'wena wēesxuúsáa ma'k yuu, tūsáa ma'k yuu, meeçxa' pesweesa ma'k yuu, txā'wē yūuna fxi'zesa's i'kwe'sx ksxavxyte jxpe'jnuwe jīnaçxáath we'wena fxi'j. Nasa txā'wēsa's i'kwe'sx yat-su pi'kxwa'jme', aça' ka'tuwa pi'kxmeena. ¹²⁻¹³ Dxusna jiimeesatxi'

txãawe'sx ma'wẽ yũusaatewa adxa' txãatxi' paapẽjna kastigãywa'j ji'phmeeth. Dxusçxáa kastigãywa'jsa' txãawe'sx ãhmée yũusaatxi'. Nawa i'kwe'sx ksxavxyte ùssa yakthê'jwe'sx ãhmée yũuni yu's i'kwe'sx paapẽywa'jsai'kwe. Txãasa txãa kazx pkal yũusa's i'kwe'sx ksxavxyu mkuutxi'jwe.

6

I'kwe'sx yuuwe yuuni's Dxusa's jiimeesa khuẽs tasxsu paatxhĩ'khni

¹ I'kwe'sx pwe'sx yuwe susni's çkĩh yũuçxakwe Dxusna jiimeesa khuẽs tasxsu paatxhĩ'khya' u'jwe', wejxwa yuwe susni's Dxusa's jiisa pwe'sx i'kwe'sxçxáa pheu'jupkaçxte. ² I'kwe'sxa' jiimeewá'kwe Dxus luuçxyã'ja' naa kiwe yuhnawa kwe'sx jxkaahwa'jsameewá'ntka'w. Txã'wẽ naa kiwe yuhnawa i'kwe'sx jxkaahwa'jsaçxa' çkĩh yũuçxakwe yuwe thẽmeesa yu's pheu'jya' ãja'çmée? ³ I'kwe'sxa' jiimeewá'kwe kwe'sxa' angeleswe'sx yuhtxwa yu'kxpehwa'jsameewá'ntka'w. Txã'wẽçxa', kwe'sx pwe'sx yuwe susni's wejx ùukhmée pheu'jwa'j ji'ptha'w. ⁴ I'kwe'sx pwe'sx kazxthê'j susna puini's çkĩjxa'kwe paatxhĩ'khya' u'jwe' Dxusa's jiimeesa tasxsu? ⁵ Na'wẽth we'we' i'kwe'sx thaamekahn: çYakthê'jwe'sx pwe'sx yuwe susni's pheu'jwa'jsa teeçxçxáawa jisameewáana açne'kwe txã'wẽ vxitetx pi'kxya' u'jwe'? ⁶ Yakthê'j pwe'sx yuwe susni's Dxusna jiimeesa khuẽs tasxsu paatxhĩ'khte' çewmanx?

7 Txã'wẽ i'kwe'sx pwe'sxíçxáa puutx puina fxi'zeni' kazx thaampa'sa', aça' çmjĩitekwe i'kwe'sxtxi pesweena ma'wẽwa pthãaweçtewa Dxusa's jiimeesa tasxsu yu' paatxhĩ'khya' u'jmée sxuuna' neeyũ'çmée? 8 Txã'wẽ yũumée i'kwe'sxtxi pesweete', i'kwe'sxwa yakthẽ'j jĩitxíçxáa pesweena kĩhwa ewmée i'kwe yũ'.

9-10 Jiimeewá'kwe Dxus jxkaahna ũsnite u'kaya' ájawa'jsameeta' txã'wẽ ewmée yũusa' jĩni's. Jxpubanuwe, txã'wẽ yũusa' Dxus jxkaahna ũsnite u'kaya' ájawa'jsameeta': Pkal kazxsate fxi'zesa, dxus ítximeesa's neewe'wesa, ptamçxawa vxite yakh fxi'zesa, piçthẽ'j pwe'sxíçxáa pkal yuuna fxi'zesa, pesweesa, vxitee jĩitx kusa'j wéesa, tũusáa, wéesxuusáa, ísxiiçxa vxitee jĩ's iiyamusa txãawe'sxa' Dxus jxkaahnite u'kaya' ájameetxna. 11 I'kwe'sxa' nyafxíi yu' txã'wẽsa i'kwe yu'. Nawa açxha' Dxus peltunãyte', jxuka yaateni i'kwe, sa' Jesukristo vxite' kwe'sx Dxus Espiritu pu'çxte', Dxus yakh yuuçxáa fxi'zesai'kwe.

Peekx kakwe's pkalte kaafxí'ze'jwa'jme'

12 Kwe'sxtxi ma'wẽ yũuweçxtewa ma'wẽwa fxi'ze'nja'w nawa kwe'sx fxi'zeni's kim yuhwa yupmeena jĩ'tx txã' isa yuja'. Nawa jxuka yuutxi's nwéesejwa'j ji'phmeetha'w, maaíi yu' seelpimeesata' txãa pa'ga. 13 Isatx we'we': Ũ'a' tutxhtewe'sxa', naapkaçxha' tutxha' ũ' jxpa'gawa'jsa', aça' txãatxi' çkim yupuukx? jĩ'tx. Isa txãa e'zsa' txã'wẽtewe'sx yuhta', aça' txãatxi' we'wewa'j ji'phmeetha'w, pçuwa'jsaçxáata' naa pa'ga. Nawa kakwe's ptammeesa yakh pkalte

kaafxi'ze'jwa'jme', txãa pa'gatey kwe'sx kakwe' Kristo jĩ', naapkaçxha' Kristo' kwe'sx kakwe's jxpe'jsa' naa pa'ga. ¹⁴ Dxusa' ma'wëga Kristo's ïtxi vxit, txã'wëy kwe'sx kakwe'swa thëymée ïtxi vxit ya'wa', naa pa'ga pkalte fxi'zewa'jsame'.

¹⁵ I'kwe'sx kakwe' teeçxa na'wëçxah Kristo kakwe'ïçxá', aç'a' txã'sa' jiimeewá'kwe. Txã'wëte', Kristo kakwe's uweçxa u'y ewmeesa yakh utxaate ¿ewmanx? Weh yuhwa txã'wë yūuwa'jme'. ¹⁶ Meeçxa' i'kwe'sxa' jiimeewá'kwe, u'y ewmeesa yakh pkal yūunijū' teeçx kakweçxáak yuuna pa'ja' jĩni's. Txã'sna we'weçxak Dxus librute na'jĩ': E'zsa teeçx kakweçxáa yuuna pa'jana jĩ'k. ¹⁷ Txãa pa'gak maawa Kristo yakh utxaate', Kristo yakh teeçx kakweçxáa yuuna pa'ja' Dxus dxi'pte.

¹⁸ Ma'wë yuhwa nyumeesa yakh kazx pkal yuuwa'jme'. Pkal ma'wësawa ũsta', nawa peekx kakwe yakh yu' meek pkal yu'. Nawa ptammeeçxa kazx pkal yuuna fxi'zesa' txajx kakwe's ïçxáak suwu', pkalte jxūna u'jçxa. ¹⁹ Jiimeewá'kwe i'kwe'sx kakwe' Dxus Espiritu u'pwa'ja', txãa pa'ga i'kwe'sx ũuste' Dxus Espiritu u'pa', aç'a' kakwe' i'kwe'sx jĩi me'. ²⁰ I'kwe'sxa' Dxus weynisai'kwe wala pa'gate. Txã'wëyã'the', kazx yūumée Dxus dxi'pte ewçxáa yūuna mfxi'zewe i'kwe'sx kakwe yakh vxite' i'kwe'sx ũus yaakxni yakhwa txã'wëy. Txã'wëme', e'zĩ Dxus jĩçxaçxáata'.

7

Ptamunisu yu'kxpehni

1 I'kwe'sx pějxna fxi'jni's āçxh pasya'wath. Piçthē'ja' nyu ji'phméé fxi'zetewa ew yuhna. 2 Nawa txā'wē pkal kazx yuuwa'jçxáak wala kaseje' naa pa'ga piçthē'ja' nyu ji'phuwa'ja', aça' txā'wēy u'ywa peekx nmi' ji'phuwa'ja'. 3 Nmi'a zhiçxkwe fxi'zewa'ja' txāawe'sx nyu yakh, aça' nyua' txā'wēy ew zhiçxkwe fxi'zewa'ja' txāawe'sx nmi' yakh. 4 Nyua' peekx kakwe' sūhna yaakxwa'j ji'phme', txajx kakwe' nmi' jī' naa pa'ga, naapkaçxha' nmi'wa peekx kakwe' sūhna yaakxwa'j ji'phme', txajx kakwe' nyu jī' naa pa'ga. 5 Ptamsa yā'ja', ih fxi'zeni's puutx wa'lwa'jme', naasáa Dxusna orāyya'waçxa yuuçxáa, maz ençxáawa txutewa'ja'. Nawa e'su yā'ja' ki' ih fxi'zewa'ja', txā'wēme' eçxthē'j kaypuba'jwe'sxte.

6 Maawa jxukaysa ptamuwa'ja's jxkaja'çmeeth, nawa ptamuçxa fxi'zenik adx yakha' ew thegu' naa pa'gaçxáath txā'jī'. 7 Jxukay adx na'wēçxaçxáa fxi'zewaç, wejx ewna sūju'th. Nawa Dxusa' nasaa iisa fxiyfxiy fxi'zewa'ja's ne' pees, vxitetxi' ptamuçxa fxi'zewa'j, vxitetxi' ptamumée fxi'zewa'j.

8 Vxiudawe'sx vxite' ptammeesatxthu yu'kxpeje' txāawe'sxa' ptamumée adx na'wēçxáa fxi'zewaç wejx ewna. 9 Nawa peekx kakwe' jxthāasni's neeweya' ājasame' ptamuçxa fxi'zeni wejx ewna, txāasuçxáa yajkxna fxi'zeyamée.

10 Nawa āçxha' ptamsatxthu jxkaaja': nyua' nmi' yakh txutewa'j ji'phme'. Na'wē jxkaahni' adx yajkçxa we'wenime', Dxusku txā'wē

jxkaaja'. ¹¹ Nawa maa enteya' maaíi yu' txã'wě nmi' yakh txutewáana nawa txãa u'ya' peena yu' vxite yakh iimi'ya' ãjameena. Meeçxa' nmi' yakh ki' yuwee ewuuçxa yu' nmi' tasxtey ki' sxawedxa' ãjana. Txã'wěy nmi'wa txajx nyu yakh txuteeya' ãjameena.

¹² ãçxa' vxitetxi' adx ũus yaakxni yakhthu yu'kxpeje': Maa yakhthě'j nyuuwa Kristo's ũuste jxpa'gasameeçxawa, nmi' yakh wa'lmée fxi'ze wěeyã'the', nmi'a' txutemeete ewna. ¹³ Txã'wěy nyua' Kristo's jxpa'gasatewa nmi'a' Kristo's jxpa'gasameeçxawa, nyu yakh wa'lmée fxi'ze wěeyã'the', txãa nyua' txutemeete ewna. ¹⁴ Nmi' Kristo's jxpa'gasameeçxawa, txajx nyua' Kristo's jxpa'gasa yakh wa'lmée fxi'zepa'ga, txãawe'sx ptam fxi'zeni' Dxus dxi'pte ewsa'. Aça' txã'wěy nyu ma'k Kristo's jxpa'gasamée yuu nawa txajx nmi' Kristo's jxpa'gasa yakh wa'lmée fxi'zepa'ga txãawe'sx ptam fxi'zeni' Dxus dxi'pte ewsa'. Txã'wěmeewaça', i'kwe'sx luuçxa' Dxus peeygãanisamée yuutxna. Nawa ewsaté íiçxáa i'kwe'sx luuçxa' Dxus peeygãanisata'. ¹⁵ Nawa Kristo's jxpa'gasamée nmi' ma'k yuu meeçxa' nyu ma'k yuu nawa txutee wěete', wa'lmeete ewna. Txã'wě yu' txuteeya' ãjane'kwe, txãa pa'gatey Dxusa' puutx puimée fxi'zewa'ja'sku jxkaaja'. ¹⁶ Txã'wě nmi' ma'k yuu meeçxa' nyu ma'k yuu nawa txã'wě peekx nmi'a's Dxus jii knayu'nja sũhna txutemée fxi'zeçxawa, jii yu' meek ya'fxi'ze' Dxusa's jiyuwa'jsamanx jiyuwa'jsameemanx nawa.

¹⁷ I'kwe'sx fxi'zewa'ja's ma'wěne' Dxus

nvxiht aça' txã'sçxáa kxtey nwēese'jna fxi'zewa'ja' nasa iisa teeçxsa na'wēçxah. Nyafxíi i'kwe'sxtxi Dxus pa'yaçte ma'wēsane'kwe yu' na' txã'wēesa mfxi'zewe. Dxusna yaakxsa mteewa pkhaakhesa ũstxna txãawe'sxtxi' txã'wēth jxkaaja'.¹⁸ Maaíi yu'sa' cirkuncidāynisa's wáa Dxus pa'yana aça' txã'wē cirkuncidāyni mneeyũ. Vxite' cirkuncidāynimeesana wáa Dxus pa'yana aça' txã'wēesa mneeyũ ya'cirkuncidāymée.¹⁹ Ya'cirkuncidāy ma'k meeçxa' ya'cirkuncidāymée ma'k nawa txã' kīhwa meesa'. Dxus jxthāasni's kxtey yuuna fxi'zeteçxáa kīhwa yuumeena.²⁰ Nasa iisa ma'wēsaçxah ne'kwe yu' Dxus pa'yaçte', txã'wēesa mfxi'zewe.²¹ Meeçxa' idxa' vxitee kusete jxkaahni fxi'zena ũste wá' Dxusa' pa'ya aça' txajũ kasehmée fxi'zewa'ja' kuh yajkxmée. Nawa txãa selpinijũ kasejxa' ewuweçxte', mkaaseh txãajũ.²² Txã'wē Dxusa' Kristo's ũuste jxpa'gaya' pa'yaçte', vxitee kusete jxkaahni fxi'zena ũssaçxawa, açxha' vxitee jxkaahnijũ kasehçxa Kristo's selpisáa i'kwe yuu Dxus dxi'pte. Txã'wēy vxitee kusete selpisamée ma'k yuu nawa açxha' vxitee kusete selpiia' u'kasa yuuna Kristo tasxte.²³ I'kwe'sxa' Dxus weynisa i'kwe pa'gate. Txãa pa'ga naa kiwete nasaa nwe'sxtxi selpisáa āhmeekwesatha'w sūhmée mfxi'zewe.²⁴ Txã'wē' naa pa'ga yakthē'jwe'sx, ma'wēsaçxah ne'kwe yu' Dxus pa'yaçte', nawa txã'wēesa mfxi'zewe nasa iisa teeçxsa na'wēçxah Dxus yakh txutemée.

²⁵ Kna'sawe'sxtxi' Dxusa' txã'wēk jxkaaja'

jīwa'j yu' kīh yuhwa ji'phmeeth. Nawa Dxus yakh ew fxi'zesa yu'kxpehni ewna sūhçxath adx ũus yaakxniju na'wē pta'sxi': ²⁶ Piçtakxa' teeçxçáa yā'j fxi'zeççxa', txā'wēesa fxi'zete ewna sūju'th adxa', naa ensu' fxi'zewa'j wala thēya' txāa pa'ga. ²⁷ Nyu ji'phyā'jçxa', tx-utewa'ja's yaakxnu. Nyu ji'phmeesa', nyu yu-uwa'jsa pakweya' yaakxnu. ²⁸ Nawa ptamunisa' pkalme', aça' kna'sa ma'k ptamuuya' yajkx nawa txāawa pkalme'. Nawa ptamusa' naa kiwete nxuswa'j thēysa's pejka ji'phutxna, aça' txāatxthu ji'phumeewaça' sūju' adxa'.

²⁹ Yakthē'jwe'sx, na'wē fxi'zewa'ja'sthu pta'sxi': Kuh enmeeçáa yā'j ũsa'. Naajūyā'ja' ptamçxawa nyu ji'phméé na'wēçxáa mfxi'zewe. ³⁰ Nxuswa'j en pa'thewa, nxusméé ũssa na'wēçxáa mfxi'zewe. Naapkaçxha' fxiestate ũssa weçxana ũssa na'wēmée mfxi'zewe. Kīh weyni ji'phçxawa txāa weyni' kwe'sx jī' sūhmée mfxi'zewe. ³¹ Naa kiwete kīhwa wala ji'phsa' ji'phmeesa na'wēçxáa meswe. Txā'wēme', naa kiwe' pçuuya'wa'.

³² I'kwe'sxa' peekx yatte thegna fxi'zewa'ja's ji'phméé fxi'zewaç wejx ewna sūju'th. Txā'wē maawa nyu ji'phmeesa' yatte thegwa'ja's yajxmée Dxus yakh ew fxi'zewa'jçxáanak pa'pçxuna fxi'ze'. ³³ Nawa nyu ji'phsa' peekx yatte thegwa'ja'sçxáak jxthaakwe pa'pçxuna fxi'ze', txajx nyu peejxmée fxi'zekahn. ³⁴ Txā'wēy u'ywa nmi' ji'phsa vxite' nmi' ji'phmeesa' txā'wēçxaçxáa yajkxna fxi'ze'çmeeta'. Nmi' ji'phmeesa' Dxus jīiçxá'sku

jxthaakwe pa'pçxuna fxi'ze', txajx kakwe txajx ũus yaakxni yã'jçxa Dxus dxi'pte ew fxi'zeyá'. Naapkaçxha' nmi' ji'phsa' naa kiwetewe'sxa'sçxáak wejx jxthaakwe pa'pçxuna fxi'ze', nmi' weçxakahn.

³⁵ Na'wëth pta'sx nawa i'kwe'sxtxi yupna txã'jĩçmeeth, wejxwa i'kwe'sxtxi selpiwa'ja's pu'çxnaçxáath txã'jĩ', kxah Dxusa's yuuçxáa wejx thaakwe selpiina fxi'zene'kwe sũhçxath txã'jĩ'.

³⁶ Txã'wëtewa maai' yu' adx niisa's kmi'a'the wejx ewna. Txã'wëme' e'suyã'ja' iimi'ya' ewumeena sũhna yaakxsa', kmi'a'jane'kwe, i'kwe'sx ũuste ma'wë Dxus kaaũusuthe'jena txã'snaçxáa kxtey yuuna. Mi'çxa fxi'zeni' pkalsame'. ³⁷ Nawa vxite' txã'wë niisa's kmi'a'j wëmeesa', kmi'a'jmeene'kwe txã'sa' kimwa jxkaahmeena açá' kmi'a'jmeeçxa', wejxwa ew yũuna. ³⁸ Maawa txã'wë kmi'a'jsa' ew iĩçxáa yũuna. Nawa kmi'a'jsame' jxthaakwe ew yũuna.

³⁹ U'y iimi'sa' nmi' yakh txuteeya' ajameena nmi' nee iĩtxiyte yu'. Txã'sa' leyku txã'wë juuna' jxkaaja'. Nawa nmi' uute yuuçxáa ki' iimi'ya' ajana maa yakhwa, nmi' yuuwa'jsa Dxusa's jiisa yakh. ⁴⁰ Nawa nmi' uuyã'the' peena yu' iimi'meeçxa', wejx wët fxi'zena. Adxa' txã'wëth yaaki', açá' adxa's Dxus Espiritu ne' kaaũusuthe'je' sũju'th.

8

Dxus iĩtximeesatx weçxaya' tajkx ikhni's pta'sxni

1 Āçxha' Dxus ïtximeesa ũsta' txãatx weçxaawa'j tajkx ikhnisa's pta'sxya'wath. Txãa çxiçxa' kîhwa suwwa'jsameetewa txã'sa' ew jiitha'w kwe'sxa'. Nawa txã'wẽ jiith sũhnisa' weeçx we'wewa'jçxáak kaseje', aça' puutx ya'peeygãhna Dxus yakh çxhãçxha fxi'zewa'j yu' ya'ji'phu'çme'. 2 Maawa txã'sçxáana jiiçxa jiith sũhna fxi'zesa', kîhwa jiimeeta' ew jiisa na'wẽ yu'. 3 Nawa txã'wẽ yũumée, Dxusa'sçxáa ũusuh jxuka yaakxsa's Dxusa' jiia' txã'wẽ yũusa's.

4 Txã'wẽ dxus ïtximeesatx weçxaya' tajkx ikhnisa çxiçxa's ũ'te çewmée dxihmanx? Ew ũus miijajkxwe. Txãa dxus ïtximeesa' naa kiwete kîh yuhwa meesata', naasáa teeçx Dxus yuuçxáa ïtxisa ũsa', peena vxite yu' meeta'. 5 Dxus yaasesa naa kiwete vxite' cielute ũswáatxna txã'wẽ yaakxsa yakh yu'. 6 Nawa kwe'sx yakh yu', teeçx Dxus yuuçxáa ũsa' kwe'sx Tata cielute ũssa. Txãak kîh yuhwa peejxmée jxuka taki'jçxa nvxiht, aça' kwe'sxa' txãa pa'gaçxáatha'w ïtxi fxi'zeya' ája'. Txã'wẽy kwe'sxtxi jxpe'jsawa teeçxçxáa ũsa', txã' Jesukristo'. Kîhwa jxuka txajx thegna jxpe'pha'gaçxáa ũsta', txãa pa'ga kwe'sxwa txajx jxpe'jnisa íiçxáatha'w.

7 Aça' txãa yakh ũssa yakha' çxiçx txã'wẽsa's ũ'tewa, kîh yuhwa suwwa'jsameetewa txã'sa' jiimeeta' jxuka yu'. Txãasatx naa kiwete dxus ïtximeesatx nyafxii neewe'wesawe'sx Dxusa's açxamée ew jiisa' çxiçx txã'wẽsa's ũ'te', ewmeena sũju'. 8 Nawa kwe'sx ũ'ni' Dxus dxi'pte ewsa vxitwa'jsame'. Aça' txã'wẽ ũ'çxa' ewsawa yuume'nja'w, sa' ewmeesawa yuume'nja'w.

9 Txã'wētewa, mpa'yajkxwe, i'kwe'sx txã'wē kīhnawa ũ'ya' āja'nja'w sūhçxa txãa çxiçxa's ũ'pa'gaçxáa Dxusa's açxamée ew jiiisatx pkalte kweete'jwe'sxte. 10 Meeçxawa na'wē wáa yuune'ga: dxus itximeesatx weçxanisa çxiçx txweyni's wáa ũ'ya' kaçxhiine'ga, açá' Dxusa's açxamée ew jiisa uyçxa', txãawa txã'wēy ũ'wena. 11 Açá' iidxpagaçxáa Dxusa's açxamée ew jiisa iidx yakthē'j ũusa' vxituna, txajx pa'gate makwe Kristo uutewa. 12 Açá' Dxusa's açxamée ew jiisa yakthē'jtx pkalte kweete'jçxa', idxwa Kristo dxi'pte yuuwesa yuune'ga. 13 Txãa pa'ga adx yakthē'j pkalte wetewe'sxte çxiçx txã'wēsa's bagaçxte yuhwa ũ'me'nja pkalte kweete'jya'mée.

9

Jesukristo jxkaahnisa' ũ'wa'ja's jxuka pēywa'j ji'pha'

1 Adxa' Jesus jxkaahnisatewe'sxthu, naa pa'ga sã'jīni's jxuka pēywa'j ji'pthu, txãa pa'gatey kwe'sxtxi jxpe'jsa Jesusa's iuuythu, sa' txajx tasxte mjīith açá' adx mjīiçxa Jesus tasxte kuutxa'jnisa i'kwe i'kwe'sxa'. 2 Vxitesa adxa's we'weçxa': Pablo' Jesus jxkaahnisatewe'sxme' jīsawa ũswáatxna. Nawa i'kwe'sx yu' txã'jīya' ājameene'kwe. Adxa' Jesukristo jxkaahnisatewe'sxte íiçxáa i'kwe'sxa' Jesukristo's nwēese'jsa i'kwe adx pta'sxte.

3 Adxna nuywe'wesatxi' na'wēth pasu': 4 Adxa' ũ'wa'ja's jxuka pējxya' ājawa'jsath. 5 Ma'wēta Jesukristo jxkaahnisawe'sxwa txãawe'sx nyuutx

pe'jçxa sã'jĩni fxi'ze' vxite' Jesus nyakh, Pedrowe'sxwa, açã' adxçxáa ¿kĩh yũuçxa txã'wëy yũuya' ãjamée yuuki'th? ⁶ Bernabé yakh kwe'sx e'zsaçxáa wáa Dxus yuwe's pta'sxna u'juçxawa ¿naa kiwete mjĩia's nvxiitwa'jsamée ne'tka'w? ⁷ ¿Maa soldauçxá' sã'jĩnimée fxi'zegá'? ¿Kinga uuthasx vxitçxa', kxtee yũnni's ũ'we'çmée? ¿Kinga kla taki'jçxawa txãa klaa leçxi's tudxi'çmée? ⁸ Adx ũsuhçxáa txã'wë yajkxçxa we'we'çmeeth. Txã'wëmeete iik Moises leytewa txã'jĩ'. ⁹ Kxteea' na'wë fxi'jni': Bweya's kmaajĩ'jiççxa', yuwe's tudwa'jme' iĩũ' mjĩikahn jĩ'k. Dxusa' txãa bweyçxáatx peeygãhçxa txã'wë we'weme', ¹⁰ wejxwa kwe'sxtxi we'weçxak txã'jĩ', txãa pa'gatey txãa leya' kwe'sx jĩik yu' naa pa'ga. Txã'wë uuthasxsu mjĩisa ma'k yuu meeçxa' kiwe's wuwsa ma'k yuu nawa kxtee mjĩini's kutxi'jçxa ũ'we'nja sũhnak mjĩ'. ¹¹ Txã'wë yã'the', kwe'sxwa i'kwe'sx ksxavxysu Dxus jĩi mjĩisatha'w açã' i'kwe'sxa' miijajkxwe ¿kwe'sx mjĩipa'ga ũ'wa'j kĩhçxáawa jxpa'gawa'j jì'phmeemtha'w? ¹² Vxite mjĩisawa ũ'wa'ja's jxpa'gane'ta açã' ¿kwe'sx yu' wejx txã'wë jxpa'gawa'jsameemtha'w?

Txã'wëçxawa kwe'sxa' mjĩipa'ga ũ'wa'ja's iipëjxmeetha'w, wejxwa kwe'sx peejini's wantã'tha'w, Kristo kaapiya'jni's yupsá na'wë yuuya'mée. ¹³ I'kwe'sxa' jii i'kwe dxuus yatte mjĩisa' dxuus yatte ũ' yakhtxi fxi'ze'. Txãawe'sxa' na'wëtx yu': altalte pu'çxsa' kxtee niimal ikhni çxiçxa'stxi ũ'we'. ¹⁴ Kristowa txã'wëyçxáak jxkaaja': Dxus yuwe pta'sxsa

txãawe'sxa' kxtee sã'jĩni fxi'zewa'j ji'phta' jĩ'k.
 15 Nawa adxa' багаçx yuhwa iipẽjxmeeth txã'wẽ
 sã'jĩwa'ja's, sa' i'kwe'sx kĩhçxáawa peeskahn
 txã'jĩna fxi'jaçmeeth. Kĩhwa sã'jĩmeetewa
 wẽtthu fxi'ze' na' txã'wẽ i'kwe'sxtxi thãasmey
 uuwa'jsath.

16 Adxa' Dxus yuwe's pta'sxpa'ga iuwejçx
 yaakiçmeeth, txãa mjĩia' adx jĩime', Dxus jĩ'
 txãa pa'ga. Aça' Dxus yuwe's pta'sxmeeçxa',
 wala yuh seena' yuuwesa yu'nja. 17 Txã'wẽ dukh
 jxthãasçxa mjĩi pakwewaça', txãa mjĩipa'ga
 jxpa'gawa'j ji'pthu sũju'nja. Nawa txã'wẽ ya-
 jkxçxa mjĩinisa yu'çme'. Txãa mjĩia's Dxusku
 ũs, aça' txajx jxkaahniçxá's kxtey yuuwa'j ji'pthu
 kĩhwa dukh jxthãasmée. 18 Dxus yuwe's wẽt
 weçxana pta'sxni adx yakha' dukhni na'wẽsa',
 aça' adx mjĩipa'ga i'kwe'sx yuutxi's dukh jx-
 thãasu'çmeeth.

19 Txã'wẽ adxa' dukh jxthãasmée ũsthu,
 aça' adxa's kim yuhwa jxkaahwa'j ji'phmeeta'.
 Nawa Kristo tasxte nasa kuh nuypa'jya'
 sũhçxa yuuçxáath selpisáa yuu jxukaysatx.
 20 Bagaçxtewa judiuwe'sx yakh ũsçxa', judiu
 na'wẽythu yu', txãawe'sxtxi Kristo jĩi knayya'.
 Adxa' Moises leya's nwẽese'jeçii yu' meeçxawa
 Moises leya's nwẽese'jsa yakh ũsçxa yu', txãa
 leya's nwẽese'jsa na'wẽythu yu', txãawe'sxtxi
 Kristo jĩi knayya'. 21 Sa' vxite nasa Moises
 leya's jiimeesa yakh ũsçxa', adxwa txãawe'sx
 na'wẽyçxáath jiimeesa na'wẽ yuuna fxi'ze'
 makwe Dxus leya's yu' nvxihtmée ũsçxawa, txãa
 pa'gatey Kristo jxkaahni'sthi nwẽese'jna fxi'ze'.
 Nawa txãawe'sxtxi Kristo jĩi knayya'çxáath

txã'wẽ yũ'. ²² Dxusa's açxamée ew jiisa yakh ùsçxa', adxwa txã'wẽy jiimeekwesa na'wẽth fxi'ze'. Nasa ma'wẽkwesate', adxwa txãawe'sx na'wẽyçxáath fxi'ze', txã'wẽ yũute' maaçxáawa ewte neeyũuwa'ja's uyuwáatxna sũhçxa. ²³ Txãasath kíhtewa jxuka txã'wẽ yũuna fxi'ze', Dxus yuwe ewsa's vxitetxwa jtxuhdeya'.

²⁴ I'kwe'sxa' peekx jii i'kwe wuwuuçxa knay wéesa' kxazí ja'daçxahtx wuwu', peeswa'j ùsna txã'sna knayya'. Nawa teeçxsa yuuçxáak knayu'. Txãa knaysawa ma'wẽga çxhãçxha wuwu', i'kwe'sxwa txã'wẽy myũuwe, peeswa'j ùsna txã'sna jxpa'gaya'. ²⁵ Maawa wuwuuçxa knay wéesa' txãawe'sx kakwe's kaapiya'jna pheu'ju'tx yaçkhëy. Txãawe'sxa' naa kiwete korona pçuwa'jsa's jxpa'gaya'çxáatx txã'wẽ yũ'. Nawa kwe'sxa' bagaçxte yuhwa pçuwa'jsame's jxpa'gaya'tha'w txã'wẽ pa'pçxu'. ²⁶ Adx txã'wẽ yũuççxa', ma'wẽ wuwuuwa'thewa jiimée yu' wuwuume'nja. Adxa' puiiya' jiimeesa na'wẽ fxiisuçxáa ujkame'nja. ²⁷ Txã'wẽ yũuya'mée, adx kakwe's kaapiya'ja'th. Txã'wẽme', vx-iteçxáatx ew kaapiya'jçxa', kaapiya'jsa adx yu' seelpimeesa yuuya'mée.

10

*Dxus ìtximeesatx neewe'wekahmen
yu'kxpehni*

¹ Yakhthë'jwe'sx miiyajkxwe: nyafxiitey kwe'sx yaçgawe'sxa' jxukay Dxus nwe'wena jxpe'jni tãaph aphnitx fxi'zena ùsu', sa' jxukay ìkhwala bejuywa ew uykhëwtxi. ² Jxukay Moises

yakh txutemée fxi'zeçxa yuuçxáatx jxukay tâaph dxiite Dxus nwe'weni yuu, sa' txã'wěy îkhuywa uykhěwtxi, ³ sa' jxukaysatx Dxus sã'jîni fxi'zena ũsu'. ⁴ Txã'wěytxi jxukaysa Dxus yusni yu'a'swa tudxna fxi'zena ũsu', sa' Dxusa' txãawe'sx yakh ih dxi'the pi'kxna u'jweççxa', penxate yu' kutxi'jçxa yusku. Aça' txãa penxa yu' Kristok yu'. ⁵ Txã'wě Dxusa' ew yūutewa, nasa wejx kuhsa yu' Dxus dxi'pte ew fxi'zemeeta', txãa pa'ga Dxus kastigāyte uutx nasa u'pnimée kiwesu.

⁶ Txã'wě kastigāyni uutx nawa txãa yu' kwe'sx jxpa'yajkçxa txãawe'sx na'wěy ewmée yūukahmençxáak txã'wě yūu. ⁷ Txãa pa'ga i'kwe'sxa' dxus îtximeesatxi' neewe'wenuwe, txãawe'sx na'wě yu'. Txãawe'sx dxus îtximeesatx neewe'weni's na'wěk pta'sxi' Dxus libru': Nasa' weçxana fxiesta'jya' takhtxi ũ'na tudxna jî'k. ⁸ Txãawe'sx na'wě ptamsamée kazx pkal yuuwa'j ji'phmeetha'w. Txã'wě yūusa' uutx teeçx enteçxáa weintitres mil nasa. ⁹ Kxtee ũssa maaí yu' Dxusa's juuna' ũusçxawe'wetx, aça' txã'wě we'wepa'ga ul weesweesa wa'kxte uutx. Nawa kwe'sxa' juuna' we'wewa'j ji'phmeetha'w Dxusa's. ¹⁰ Maaí yu' Dxusa's açewe'wetx ewmeek yūu jîna. Aça' txã'wě we'wepa'ga, Dxus kaahni angel txãawe'sxtxi' ivxiituk. Nawa kwe'sxa' txã'wě açewe'wewa'j ji'phmeetha'w.

¹¹ Txãniitey kwe'sx yaçgawe'sxtxi txã'wěk yūu, aça' txã'sa' Dxus librute fxi'jnik neeyūu kwe'sxwa jxpa'yakx fxi'zekahn, nmeh ensa' utxaana u'jweça' txãa pa'ga. ¹² Txã'wě Dxus yakh ew ũsthu sūhna yaakxsa' jxpa'yakxwa'ja' pkalte weteya'mée. ¹³ I'kwe'sxtxi pkalte

pētxwa'jsa pa'ja'ne' txā' u'sesa thaakwe seena' thēysameeta', jxukaysa txā'wēsaçxaçxáatx ji'phusatha'w. Nawa Dxusa's pi'kine'kwe aça' txā' i'kwe'sx wantāyya' çxhāçxhawa'jmeesa yu'sa' kaavxya'ja'jmeena, wejxwa pkalte pētxwa'jsa pa'jaçpkaçxha', ma'wē txāa pkaluh iyuwa'ja'swa ih pu'çxhina Dxusa'.

¹⁴ Txāa pa'ga yakthē'jwe'sx, dxus ïtximeesatx neewe'wenijū kasejkahn yu'kxpehni's mwēese'jwe: ¹⁵ I'kwe'sxa' peekx jii i'kwe adxa' kīh yuupa'ga ne'tka txā'wē jxkaaja' nawa adx we'weni's mpa'yajkxwe.

¹⁶ Ūus miijajkxwe: Kristo' uuççxa' txajx eea's pkawku aça' txāa uuni's kaayaki'jsa wasotewe'sxa's jxpa'gaçxa oraī'tha'w. Txā'wē yūunisa' Kristo yakh utxaaçxa txāa yakh txutemeetha'w fxi'ze' jīnisa'. Txā'wēy Kristo' uuya' txajx kakwe's dukhku aça' txāa uuni's kaayaki'jsa pana's pe'ltedeçxa jxtxude'tha'w. Txā'wē yūunisa' Kristo yakh utxaaçxa txāa yakh txutemée ihtha'w fxi'ze' jīnisa'. ¹⁷ Makwe wala kuhçxawa teeçx pana'sçxāa jxukaysatha'w ũ'we', txāasatha'w teeçxçxāa na'wēsa yuuna pa'ja'.

¹⁸ Miijajkxwe Israelwe'sxtxi. Txāawe'sxa' Dxusna weçxaya' tajkx ikhni çxiçxa's ũ'sa' Dxus yakh txutemée fxi'zesaçxatx txā'wē yū'.

¹⁹ Txā'jīte', txā'wē yūuya' tajkx ikhnisa çxiçxte kīh pēthejene' sūjkahn txā'jīçmeeth, txāa pa'gatey dxus ïtximeesa' kīhwa meesata'.

²⁰ Txā'wētewa, dxus ïtximeesatx weçxaya' tajkx ikhe'tx Dxus cielutewe'sxa's jiimeesa',

aça' txã'wê yũuni' dxus ãtximeesaçxáatx weçxanisame', eçxthê'ja's weçxanisa'. Aça' i'kwe'sxa' txã'wê eçxthê'j yakh utxaaçxa fxi'zenuwe jĩçxath txã'wê we'we'. ²¹ Txã'wê eçxthê'j yakh utxaaçxa weçxana ũsçxa', Kristo puuçni mesatewe'sxa's yu' jxpa'gaya' ãjameene'kwe. ²² Kwe'sxtxi jxpe'jsa Jesukristo's kaaũsçxa'jwa'jsameetha'w kwe'sxa', txãa pa'gatey txãate jxthaakwe çxhãçxhasameetha'w naa pa'ga.

Kĩhnawa ũ'ya' ãjawa'jsatha'w, nawa jxpa'yakxwa'ja' vxitetx peeygãhçxa

²³ Isa kwe'sxa' kĩhnawa ũ'ya' ãjawa'jsa yuhtha'w, nawa jxpa'yakxwa'j ji'ptha'w. Makwe kĩh ũ'nawa ũ'ya' ãja'nja'w nawa txã' Dxus yakh çxhãçxha fxi'zewa'j yu'sa' pu'çxhi'çmeeta'. ²⁴ Peekx fxi'zewa'jçxá's yajkxmée, vxitetxwa peeygãawa'ja' ew kfxi'ze'jya'.

²⁵ Merkaute çxiçx ma'wẽsanawa weyçxa maa sũhmée ũ'wa'ja', ²⁶ txãa pa'gatey Dxus jĩiçxaçxáata' naa kiwe, txã'wëy naa kiwete ũssa kĩjkĩhwa jxuka.

²⁷ Meeçxa' Dxusa's jiimeesa pi'kxte', i'kwe'sxa' u'jçxa kĩh puuçtewa txã'sa' ũ'weçxáane'kwe maa sũhmée. ²⁸ Nawa Dxusa's açxamée ew jiisa' na'jĩna we'wena: Naa çxiçxa' dxus ãtximeesatx weçxanisa' na' ewmeena jĩte', idxa' txã'sa' ũ'meene'ga, txã'wê pta'sxsa's kaypuba'jya'mée. ²⁹ Vxitesa ũus yaakxni's jxpa'yakxkahnthu we'we', iidx ũus yaakxni's we'weçmeeth.

Nawa Dxusa's sxiigmée ew jiisa' na'wě pēyina: Adx kīhnawa ũ'ya' ājani's ħkīh yūuçxa vxitesa neeweya' ājakx? ³⁰ Adxa' kīh ũ'weççxawa Dxusa's weçxana orāyçxath ũ'we', aça' adx ũ'ni's ħkīh yūupa'ga ewmée nuywe'wetxki? jītxna. ³¹ Ew yuja', nawa i'kwe'sx ũ'nisa ma'k yuu kīh yūuççxawa Dxus dxi'pte selpiiwa'jsaçxá's thegçxa kxtey myūuwe. ³² Judiuwe'sx vxite' judiumeesa, meeçxa' Dxus luuçx maatxwa kaypuba'jwe'sxte' mpa'yajkxwe. ³³ Adxa' na'wěçxáath pa'pçxu': peekx wět fxi'zewa'j yu's yajkxmée, vxitesatx pu'çxwa'ja'sçxáath pakwena fxi'ze', txāawe'sx ũusa' ewte neeyūukahn.

11

¹ Adxwa ma'wětka Kristo fxi'zeni's thegçxa fxi'ze', txā'wēy i'kwe'sxwa adx fxi'zeni's thegçxa mfxi'zewe.

U'ya' kultote jxpa'yakxwa'j ji'pha'

² Yakhthē'jwe'sxtxi weçxa'th adxa's peçxkanamée yajkçxa adx kaapiya'jnitxi' kxtey yuuna fxi'zepa'ga. ³ Nawa na'wěsa'swa mjiyuwe: Kristo' Dxusa's nwēese'jsa', aça' piçthē'jwe'sxa' Kristo's nwēese'jwa'jsata', aça' u'ywe'sxa' nmi'tx nwēese'jwa'jsata'. ⁴ Txā'wě yūuwa'jsaçxah maa piçthē'jwa'çxua'a's ki'pmée kultote orāyna Dxus yuwe's pta'sxna ũsçxa', Kristo's weeçxsa yuuni'. ⁵ Txā'wēy maa u'ywa dxikthe's ya'pathmée orāyna Dxus yuwe's pta'sxna ũsçxa', txajx nmi'a's weeçxsa yuuni'. Txā'wě ya'pathmeete', dxkhasa's kwaaka'jni

na'wēsa'. ⁶ U'ya' txā'wē ya'patheçmée yā'jçxa', tehwed dxkhasa's tee kwaaka'j. Nawa u'y txā'wē dxkhasa's kwaaka'the' thaameweçxte', tee ya'path txajx dxikthe's. ⁷ Piçthē'ja' dxikthe's ya'pathwa'jsame', txāa pa'gatey Dxus wedxçxak txāa na'wēysa vxit, txajx jxkaahnitx nwēese'jwa'jsa. Naapkaçxha' u'ya' piçthē'j jxkaahnitx nwēese'jwa'jsa'. ⁸ Dxusa' piçthē'ja's taki'jiççxa', u'y kakwejuwe'sxa's kutxi'jçxa pheu'jme', wejxwa piçthē'j kakwejuwe'sxa's kutxi'jçxak u'ya's pheu'j. ⁹ Piçthē'ja' pu'çxwa'jsa peejxku yu', txāa pa'gaçxáak u'ya' pheu'jni yuu. U'y txā'wē pu'çxwa'jsa peejxte piçthē'ja's pheu'jni yuume'. ¹⁰ Txāa pa'ga u'ya' piçthē'ja's nwēese'jwa'jsa' jīni dxikthete ya'pathnisa ji'phuwa'ja'. Txā'wē ya'pathwa'jsaçxah kxtey yuumeete', Dxus angeleswe'sx thegna ūsta'. ¹¹⁻¹² Txā'wētewa, ew ūus yajkxte yu', maa yuhwa thaakwesameeta', txāa pa'gatey piçthē'jwaçwa u'y kakwetemée peekxçxáa yu' naa kiwete upxya' āja'çme', txā'wēy u'ywa piçthē'j ji'phmée peekxçxáa yu' naa kiwete upxya' āja'çme'. Isa yuja' u'ya' piçthē'j kakwejuwe'sxa'sku pheu'jni yuu, txā'wēy piçthē'jwa u'y kakwetek upxya' āja'. Txāasa maa yuhwa thaakwesamée, e'zīi Dxus pheu'jniçxaçxáata'.

¹³ Txā'wē' naa pa'ga i'kwe'sx pwe'sx ūus mi-iyajkxwe, aan ewna txā'wē Dxusa's orāiççxa u'ya' dxikthe's ya'pathmeete. ¹⁴ Piçthē'ja' peekx yuu dxkhas jxu'j ji'phuwa'jmeesaçxa txā'wē khyu'ja'the', thaame yuja'. ¹⁵ Nawa u'y txā'wē dxkhas jxu'j ji'phte', zhiçxkwesa'. Txāa

pa'gatey dxikthe's aphwa'jiiçxáak dxkhas jxu'j nvxiitni yuu. ¹⁶ Nawa maaíi yu' dxikthe's ya'pathwa'ja's jxkaahni's wa'lsa úsçxa', peekx úus yaakxwa'j ji'phta'. Txã'wême' kwe'sx vxite' Dxus luuçx msuuwe'sx maa yuhwa jiimeeta' dxikthe's ya'pathmée Dxusa's orãyni yu's.

Ewmée yũuya'çxáa Santa Cena's ũ'ya' pkhaakheni

¹⁷ Na'wêsana pta'sxna fxi'jaççxa', i'kwe'sxa' ew yũusa i'kwe jĩna weçxaya' ãja'çmeeth. I'kwe'sxa' Dxusa's weçxaya' pkhaakheni' selpiipkaçxte, wejx suwsaçxáana sũju'th. ¹⁸ I'kwe'sxa' Dxusa's weçxaya' pkhaakheççxa', багаçxtewa i'kwe'sx pwe'sx puutx fxiifxii txuteeya'çxáatx pkhaakhe' jĩ'tx aç'a' txã'wê pta'sxni' isa yuhna sũju'th. ¹⁹ Pkhaakhesa i'kwe'sx pwe'sx txã'wê fxiifxii txuteni' ew yuhna, txajiiçxáa mtee pkhaakhesa wejx Dxus yakh ew fxi'zesatewa ya'jiyuna. ²⁰ Nawa Jesukristo mesatewe'sxa'stha'w jxpa'ga' jiiççxa' txã'wê fxiifxii txuteeçxa ũsni' txã' Dxus jxthãasnime'. ²¹ Txãa pa'gatey i'kwe'sxa' ih pkhaakheçxa ja'daçxah ũ'wa'j en ajaçpkaçxha', puutx fxii txuteeçxa maaíi yu' yaçte ũ'we'i'kwe, vxite jii yu' nvxihtmée. Aç'a' vxiteçxáa txikpkaçx meeçxawa tũunus tudxte', vxite yu' ũ'wa'j ji'phmeetx wêena neeyũ'. ²² Txã'wêçxáa yũuççxa', i'kwe'sx yat-suywa ũ'wa'jna. Txã'wême', vxitee ũ'wa'j yu' nvxihtmeeçxa', kxũusu'ju'i'kwe, aç'a' puutx yaaçeniçxáak kaseje'. I'kwe'sx txã'wê yũuna ũste', adxa' i'kwe'sxtxi' ew yũuna ũsi'kwe

jĩna ¿weçxaya' ãjama'th? Na'wẽçxáa yũute', weçxaya' ãjame'nja.

Santa Cena's ũ'wa'ja's Kristok kaapiya'jçxa nvxiht

²³ Adxa' i'kwe'stxxi' kaapiya'th nawa Jesukristo adxa's ma'wẽ kaapiya'the' txã'wẽyçxáath kaapiya'j txã' na'wẽ': Jesusa's ikhkahn dukhwa'j kus ãjaçte', txãa kusuçte pana's kusete jxpa'gak.

²⁴ Sa' Dxusa's weçxana orãyçxa', pe'ltedeçxa na'jĩk: Mẽ'we. Naa pana' adx kakwe's i'kwe'sx pa'gate pe'ltedenisa na'wẽsa'. Txã'wẽ myũuwe adx pxthaa yuuçxa uuni's bagaçxtewa yajkxya'.

²⁵ Ũ'na jxã'jçxa', txã'wẽy waso's jxpa'gaçxa na'jĩk: Adx eea's pkawçxa yuuçxáa i'kwe'stxxi nwe'wewa'ja's Dxusa' u'se pheu'jçxa nvxihtku. Aça' naa wasotewe'sxa' adx ee i'kwe'sx pa'gate uwusáa na'wẽsa'. Txã'wẽ tudx iisa adx pxthaa yuuçxa ee pkawni's bagaçxtewa kaayaki'jwa'jsa' jĩnak kaapiya'j. ²⁶ Txã'wẽ yã'the', bagaçxtewa naa pana's ũ' iisa, naa wasotewe'sxnawa tudx iisa i'kwe Jesukristo uuni's yajkxna nes yu', txãa sxawedna kĩhpkaçx.

Santa Cena's jxpa'gaya'waçxa' na'wẽ yũuwa'ja'

²⁷ Txã'wẽ maawa Jesukristo kaapiya'jni's kĩhwameesa na'wẽ Dxusa's yajkxmée maa sũhmée wáa pana's ũ'na wasotewe'sxnawa tudxiitxna aça' txã'wẽ yũusa' pkalte wetesá yuutxna, txã'wẽ Jesukristo kakwe vxite' txajx ee na'wẽsa's kĩhtewa seelpimeesa na'wẽçxáa yũupa'ga. ²⁸ Txãa pa'ga ũus miiyajkxwe teeçxsa na'wẽçxah pan vxite' wasotewe'sx txãatx jxpa'gamey. ²⁹ Txã'wẽme' nxuste

wetewa'ja's peekii pakwesáa yuutxna, txã'wẽ Jesukristo kakwe vxite' txajx ee na'wẽsa txãatx kĩhtewa seelpimeesa na'wẽ maa sũhmée jxpa'gapa'ga. ³⁰ Txã'wẽ jxpa'yakxpa'gamée i'kwe'sx ksxavxytewe'sx maaii yu' aç'a'na çxhãçxhamée ũsta', naapkaçxha' vxite' uuna ũsta'. ³¹ Peekii wala jxpa'yakxna fxi'zewaç'a', txã'wẽ nxuste wetewa'j en pa'jmeena. ³² Nawa Dxusa' kwe'sxtxi peeygãhçxak kastigo kaja', ki'kin txã'sna pakwete', bagaçxte yuhwa Dxus yakh puutx uywa'jmeesawe'sx yakh kaajxa'mée.

³³ Na'wẽ' aç'a' açxha' adx yakthê'jwe'sx, Jesukristo mesatewe'sxa's ũ'ya' pkhaakheçça', teeçxsa na'wẽçxah puutx ya'peeygãhna ja'daçxah ũ'ya' mũythaswe. ³⁴ Maaii yu' wala wẽesa ũsçxa', txajx yatte ũ'wena, txã'wẽ puutx ya'peeygãhmée pkhaakhete', Dxus kastigãywe'sxte. Vxite yuwe ũsta' txãatxi's adx pa'jçxa pheu'ju'nja.

12

Dxusna selpiwa'ja's Dxus Espiritu' nasa iisa fxiyfxiyçxah ũsni

¹ Na'wẽ Dxus Espiritu' nasa iisa fxiyfxiyçxah Dxusa's selpiia' ajawa'ja's ũsu'k txã'sna pta'sxya'wath, aç'a' yakthê'jwe'sx jxpa'yakx mwẽese'jwe.

² I'kwe'sxa' ew jii i'kwe Dxusa's jiyumeyçxa', naa kiwete dxus itximeesatx i'kwe nwẽese'jna fxi'ze'. ³ Txãa pa'ga açxha' ew mjiiyuwe: Jesusa' seena' ewmeesa' jina açewe'wesa' Dxus Espiritu kwe'we'the we'wesameena. Sa' txã'wẽy Jesusa'

adxna jxpe'jsa' j̄na we'wemeena kim yuhwa, txā'wē Dxus Espiritu kwe'we'jmeete yu'.

⁴ Kīhwa yūuya' ājawa'j ūsta', aça' nasa' txāatx jxpa'gatzna. Nawa txāa ājawa'jtx ūssa yu', Dxus Espiritu teeçxçá'. ⁵ Ma'wēwa selpiwa'j ūsta', aça' nasa iisa makwe fxiyfxiyçxah selpiççxawa, teeçx Dxusçxáanatha'w selpi'. ⁶ Ma'wēwa fxiyfxiyçxah mj̄iwa'jwa ūsta', nawa teeçx Dxus yuuçxáak fxiyfxiyçxah mj̄iwa'ja'swa kaapiya'ja'. ⁷ Nasa iisa fxiyfxiy selpiwa'ja's Dxus Espiritu' jxukaysatx peesu'sku, nasaa nwe'stxxi pu'çxna fxi'zekahn. ⁸ Dxus Espiritu' maaítxi' Dxus yuwe's jxpubamée jiyuya' ājawa'ja'sku ūsu'. Txāa Espiritu' iıçxáa maaítxi' ma'wēwa yu'kxpejxa' ājawa'ja'sku ūsu'. ⁹ Txāa Espiritu' iıçxáa maaítxi' Dxusa's ūuste jxpubamée yaakxwa'ja'sku ūsu'. Vxitetxi's āça'satx nuyçxhãaçxhawa'ja'sku ūsu'. ¹⁰ Maai' yu' kim yuhwa ājanimeesa's ājawa'ja'stxi jxpa'ga'. Sa' vxitetxi's Dxus kīh yūuya'watewa dxiikhēy jiyuçxa pta'sxya' ājawa'ja'sku ūsu'. Vxitetxi's maa txā'wē Dxus Espiritute', vxite' maa Dxus Espiritumeetewa jiyuwa'ja'sku ūsu'. Aça' vxite' jxpa'ga'tx yuwe fxiysaju we'weya' ājawa'ja's, naapkaçxha' vxite' txāa yuwe fxiysaju we'weni's āate pta'sxya' ājawa'ja'stxi jxpa'ga'. ¹¹ Nawa txā'wē nasa iisa fxiyfxiy selpiya' ājawa'ja's ūssa' Dxus Espiritu' teeçx yuuçxá'. Txāa yuuçxáak teeçxsa na'wēçxah kīh mj̄iia' ājawa'jsatewa txāatx ūsu'.

Jxukaysa teeçxsa kakwetewe'sxçxaçxáatha'w

12 Kakwewa ma'wē teeçxçáaçaawa kuh jwed ji'phna fxiyfxiysa, aça' Kristowa txã'wēysa'. Makwe kuh jwed fxiyfxiysaçaawa, kxazíi teeçx kakwetewe'sxçxáata'. 13 Dxus Espiritu txã'wē kwe'sx ma'wēsaxwa Kristo tasxteçxaçxáa kutxa'the', teeçx kakwetewe'sxçxáatha'w yuu. Judiu ma'k yuu meeçxa' judiumée ma'k yuu, selpiisáa ma'k yuu meeçxa' selpiisamée ma'k yuu nawa txãazkuēsay Dxus Espiritu teeçxçxáa ũsa' txãaçaçxá'stha'w jxpa'ga' jxukaysa.

14 Kakwe' teeçx jwedsa yakhçxáa kakwe yuuna pa'ja'çme'; wala kuh jwed ji'pha'. 15 Çxida' we'wewaça', na'jīna: Adxa' kusemeeth, sa' txãa pa'ga kakwetewe'sxmeeth jīna nawa txã'wē kusemeeçxawa kakwetewe'sxiçxá'. 16 Meeçxa' thū'wē' we'wewaça', na'jīna: Adxa' yafxmeeth, sa' txãa pa'ga kakwetewe'sxmeeth jīna nawa txã'wē yafxmeeçxawa kakweteywe'sxiçxá'. 17 Txã'wē kakwe' jxuka yafxçxaçxáawaça', ¿ma'wē wēse'jya' ājakxtha'w? Meeçxawa kakwe' jxuka wēse'jnisaçxaçxáawaça', ¿ma'wē jxputaya' ājakxtha'w? 18 Nawa Dxusa' kwe'sx kakwetewe'sx kuh jwedku ki'p, kīhçxahne' peejx yu' txãatxi' jxuka. 19 Teeçx jwedsaçxáawaça', ¿ma'wē kakwe' selpiiya' ājakx? 20 Txã'wē kakwetewe'sxa' kuh jwedsaçaawa teeçx kakweteeçxaçxáatx jxukaysa selpi'.

21 Yafxa' kuse's we'weçxa': Idxa'sa' jxpeejxmeeth ¿jīya' ājama'k? Txã'wēy dxikthewa çxidatx we'weçxa': Idxa'sa' jxpeejxmeeth ¿jīya' ājama'k? 22 Txã'wēmée wejxwa kakwetewe'sx kīhtewa seelpimeesa

na'wêçxawa, txãáiçxáa jxthaakwe jxpeejsata'.
²³ Kakwetewe'sx jxthaakwe yu' peejinimeesawa ũsta', makwe txã'wêtawa txãatxwa jxpa'yaki'tha'w. Sa' txakwe zhiçxkwe pheu'jna jxpe'jwa'jmeesa'swa ewtha'w pheu'ju', jxthaakwe yu' peejmeesa na'wêsatewa.
²⁴ Dxusa' txã'wêk jwee peejmeesa na'wêsatxwa ki'pna kakwe's pheu'j, txãáiçxáa jxthaakwe selpiwa'jsa. ²⁵ Txã'wê kakwetewe'sxa' puutx yahçemée kxaazkuëy ja'daçxah puutx ya'pu'çxwa'jsata'. ²⁶ Kakwetewe'sx teeçx jwedsa pxthaa yuuçte', vxitewa jxukaysa nxus pu'çxhi'tx. Kakwetewe'sx teeçx jwedsa peeygãani yuuçte', vxitewa weçxweçxatx yaakx pu'çxhi'.

²⁷ Äçxha' mjiyuwe: i'kwe'sxa' nasa iisa teeçxsa na'wêçxah Kristo kakwete selpiisáa i'kwe. ²⁸ Txãa pa'gak Dxusa' txajx luuçxtxi' fxiyfyiy selpiwa'ja's peesu's teeçxsa na'wêçxah: Nyafxtewe'sxa' Kristo jxkaahnisawe'sxtxi yuu. E'stewe'sxa' Dxus kîh yũuya'watewa dxiikhëy jiyuçxa pta'sxwa'jsatx nvxiitni yuu. Tekhtewe'sxa' kaapiya'jwa'jsatx nvxiitni yuu. Txajũ' kim yuhwa äjanimeesa's äjawa'jsatx nvxiitni yuu. Naapkaçxha' vxite' äça'satx nuyçxhãaçxhaya' äjawa'jsatx nvxiitni yuu. Vxite' kîhteçxáawa pu'çxya' äjawa'jsatx nvxiitni yuu. Vxite' jxkaahwa'jsa nvxiitnitx yuu, naapkaçxha' vxite' yuwe fxiysaju we'weya' äjawa'jsatx nvxiitni yuu. ²⁹ Jxukay yu' Kristo jxkaahnisatewe'sx yuumeeta'. Jxukay yu' Dxus kîh yũuya'watewa dxiikhëy jiyuçxa pta'sxsa yuumeeta'. Jxukay yu'

kaapiya'jsa yuumeeta'. Jxukay yu' kim yuhwa
 ājanimeesa's ājawa'jsa yuumeeta'. ³⁰ Jxukay yu'
 āça'satx nuyçxhãaçxhaya' ājawa'ja's jxpa'gasa
 yuumeeta'. Jxukay yu' yuwe fxiysaju we'weya'
 ājawa'jsa yuumeeta'. Jxukay yu' txã'wẽ yuwe
 fxiysaju we'weni's āate pta'sxya' ājawa'jsa
 yuumeeta'. ¿Txã'wẽ meetxna' wakx? ³¹ Selpiia'
 ājawa'j maaçxah wejx thaakwe peejsatxna
 txãatx mpaakwewe. Nawa adxa' txãate
 jweeíçxáa thaakwe peejsa's pta'sxya'wath.

13

*Peeygāanisa yuuçxáa kīhtewa thaakwe
 walasa'*

¹ Adxa' makwe seena' wala zhiçxkwe we'weya'
 jii yu'nja naa kiwete nasa walasa na'wẽ, txã'wẽy
 angeleswe'sxte ja'da, nawa peeygāawa'j yu'sa'
 ji'phméé yu'nja aça' adx we'weni' kīhte yuhwa
 selpiimeena. ² Dxus kīh yūuya'watewa dxiikhēy
 jiyuya' ājawa'ja's ji'ph yu'nja, sa' kim yuhwa
 jiyunimeesa kījkīhnawa jxuka jiisa yu'nja, sa'
 txã'wẽy Dxusa' pu'çxhina sūhwa'j yuuçxá's
 ũuste yajkxçxa vxiç walatxwa fxiite ki'pxa'
 ājawa'ja's ji'phu'nja, nawa peeygāawa'j yu'sa'
 ji'phméé yu'nja aça' makwe txã'wẽsaçxawa
 kīhte yuhwa seelpimeesa yu'nja. ³ Txã'wẽy
 adx ji'phuni's kījkīhnawa jxuka jxtxuude'nja, sa'
 adx kakwe yuhnawa kabkahn dukhma'th, nawa
 peeygāawa'j yu'sa' ji'phmeete', kxul yuh txã'wẽ
 ya'yuuna.

⁴ Maawa peeygāawa'ja's ji'phsa', ũusçxa
 yaaki'çme', maa yakhwa jxuka ewsa', maa

yuhtxwa açe'çme', iivejçx yaaki'çme', iivejçx we'we'çme', ⁵ vxitetx juuna' yũ'çme', peekx wēt fxi'zewa'j yu's pakwe'çme', ũusçxa'çwame', açeyaaki'çme'. ⁶ Pkalte vxite weteçte', txāawe'stxxi npeevxysxijkana weçxa'çme', naasáa ew fxi'zeniçxá'sku wēt wēt yajkxna weçxá'. ⁷ Makwe kīhwa thēysa pa'thewa ũukh yajkxmée peeygāawa'jçxá's ji'phçxa' jxukak wantaī', Dxusa' pu'çxhina sūhna.

⁸ Dxus kīh yūuya'watewa dxīikhēy jiyuçxa pta'sxna fxi'zenisa' pçuwa'j en ājana, aça' peena yu' txā'wē yūuwa'j peejxmée yuuna, aça' yuwe fxiysajuwa ya'we'wemeena. Kīhtewa jxuka jiith sūhnisawa pçuuna. Nawa peeygāanisa yu' bagaçxte yuhwa pçumeena. ⁹ Txāa pçuwa'jsa le'çxkwesaçxáatx jxpa'gaçxa ji'ptha'w, txāasatha'w jxuka pta'sxya' yu' āja'çmée. ¹⁰ Nawa kīhtewa peejxmée jxuka jiyuwa'j en āhte', txāa pçuwa'jsa le'çxkwesatx ji'ptha'w txā' skhēuutxna.

¹¹ Adxa' luuçxteya' jiiimée luuçx we'weniçxáatxthu we'we', sa' luuçx ũus yaakxniçxáatxthu ji'phu', sa' luuçx na'wēçxáath jii fxi'ze'. Nawa jxuka thē'jsa yuuna kāhçxa', luuçx na'wē jiiimée fxi'zeni's nvxihtthu. ¹² Txā'wēy iičxáatha'w āçxhíi yu' ew jiyu'çmée, çxhi'dxte speejute thegte ma'wē psxūuçxáa vxyaakx txā'wēçxáatha'w uyu'. Nawa kīhte yuhwa peejxmée jxuka ew jiyuwa'j en āhte', seena' ew puutx pdxi'p āate uyu'nja'w. Āçxhíi yu' jxukamée le'çxkweçxáa jiith. Nawa txāa jxuka jiyuwa'j en āhte', kīhte yuhwa peejxmée

jxuka jiyu'nja Dxuswa ma'wě adxa's ew jiina txã'wěy. ¹³ Khĩ'jii pta'sxthu txãaçxáa pçuute', na'wěsa tekh ũsta' txãa yu' bagaçxte yuhwa skhēwwa'jsameeta': Dxusa' pu'çxhina sũhna yaakxnisa, vxite' Dxus yakh puutx uywa'ja's ũythasna fxi'zenisa, vxite' peeygãhna fxi'zenisa. Nawa txãa tekhsatx kxsusthu txãate thaakwesa' peeygãhna fxi'zenisa'.

14

Yuwe fxiysaju we'weni' nasatxi' selpi'çme'

¹ Nyafxte' peeygãawa'ja's khuẽ'y wejx thaakwe mpa'pçxuwe. Txãa e'su mpaakwewe ma'wě selpiwa'ja'swa Dxus Espiritu ũsu'k txãatx. Nawa i'kwe'stxxi Dxus we'weni's pta'sxya' ãjanisaçxáa wejx seelpisa'. ² Txã'wěme', maawa yuwe fxiysaju we'wesa' nasa yakhmée, Dxus yakhçxáa ne' we'we' jiyuwa'jmeesa's Dxus Espiritu kwe'we'jni, aç'a' kim yuhwa jiyu'çmeeta'. ³ Naapkaçxha' i'kwe'stxxi Dxus we'weni's pta'sxsa', naa kiwete nasatx kaajiyu'ju'k Dxus yakh çxhãçxha fxi'zewa'ja's vxite' nxuste fxi'zeçtewa kvxiisxa'jna. ⁴ Yuwe fxiysaju we'wesa' peekíçxáak Dxus yakh çxhãçxha fxi'zewa'ja's ya'jypa'ga'. Nawa Dxus we'weni's vxitetx pta'sxsa', Dxus luuçxtxi kçxhãaçxha'jsa'.

⁵ Yuwe fxiysaju we'weya' jxukaysa ãjawaça', wala yuh ewna sũju'th adxa'. Nawa Dxus we'weni's vxitetx ãate pta'sxya' ãjani'sthuw wejx thaakwe jxthãasu'. Txã'wě yũunisaçxáa thaakwe ewsa'. Meeçxa' txã'wě yuwe fxiysaju

we'wesa ũste', pukate vxite āate kaajiyu'the yu' ew yuhna, txā'wē yu' Dxus luuçx jiyutxna Dxus yakh çxhāçxha fxi'zewa'ja's.

⁶ Yakhthē'jwe'sx, ũus miiyajkxwe: Adx pa'jçxa yuwe fxiysaju we'wete', i'kwe'sxa' çkīhçxá' jiyuya' ājama'kwe? txā'wē kwe'sx we'wenimée yuwejuçxáa we'wete'. Nawa Dxus we'weni's pta'sxiççxa', kwe'sx we'weni yuweju kaapiya'jna āate kaajiyu'the yuuçxáa i'kwe'sxa' ew jiyune'kwe Dxus jxkaahnitx.

⁷ Na'wēsatax miiyajkxwe: músika tukanisa kuvxy vxite' kxtala txāatx ma'wēwa ksuusu'the', ya'jiyumeena mem ma'wēsa's tukaçtewa.

⁸ Txā'wēy gweçxate puiiya' u'jwa'ja's ew kaajiyu'jna korneta's āate tujkameete', kim yuhwa jiyumeeçxa' pheu'jmeetxna puiiwa'ja's.

⁹ I'kwe'sx yakhwa txā'wēyçxá'. Yuwe fxiysaju we'wete', çma'wē ya'jiyukx kīh we'weçtewa? Ya'jiyumeena aça' kxul yuh yuuna. ¹⁰ Isa naa kiwete' yuwe ma'wēsawa ũsyuhta'.

Nawa maa yuhwa txāawe'sx pwe'sx puutx we'weya' ājanimeesa yu' meetxna. ¹¹ Maawa adx yakh we'weççxa', adx we'weni yuwe jiyunisaju we'wemeete', txāa yakha' puutx we'weya' ājame'nja nasa fxiysa na'wē.

Aça' txāawa adx yakh puutx we'weya' ājameena nasa fxiysa na'wē. ¹² Txāa pa'ga i'kwe'sxa' nakwe wala kījxa'wa ājawa'ja's pakwe'i'kwe na' Dxus luuçxtxi kçxhāççxha'jwa'jsaççxá's mpaakwewe.

¹³ Txā'wē yā'the', yuwe fxiysajuçxáa we'wesa' Dxusa's mpi'kxwe txāa yuwe fxiysaju we'weni's nasatx āate kaajiyu'jya'

ājaya'. ¹⁴ Txã'wě yuwe jiyunimeesaju Dxusa's orãÿçxa', ũuste yu' Dxusa's yajkxna txã'wě ya'yuuna, nawa kīh we'weçxawa txãa yu'sa' ya'jiyumeena. ¹⁵ Txã'wēte', ¿ma'wě wejx ewki? Ũusteçxáa Dxusa's yajkxna txã'wě yūumée, kīh we'weçxawa txã'snawa jii txã'wě yuuní wejx ewna. Meeçxawa Dxusa's yajkxna memuuççxa', txã'snawa yuwe jiyunisaju memwa'jna. ¹⁶ Idxa' txã'wě yuwe jiyunimeesajuçxáa Dxusa's weçxana tuuthe'jene'ga aç'a nasa jiimeekwesa kxte ũssa' idx yakh ja'da Dxusa's weçxana tuuthe'jya' ājameetxna, kīh we'weçtewa jiyumeeçxa'. ¹⁷ Dxusa's weçxana orãÿni' idx yakh yu' wala yuh ewna, nawa vxite yu'sa' selpiimeena. ¹⁸ Dxus pu'çxte adxa' vxite yuwe fxiysaju we'weya' i'kwe'sxte jxthaakwe jiith. ¹⁹ Nawa yuwe jiyunimeesaju wala jxu'j we'wena ũs na'wě', wejxwa Dxus luuçx ksxavxyte ũsçxa', yuwe jiyunisaju jxu'jmeekweçxáa kaapiya'jna we'wewaççxáa ewna sūju'th.

²⁰ Yakhthē'jwe'sx, luuçx le'çxkuē na'wě yuuna fxi'zenuwe. Naasáa ewmée yūuwa'j yuuçxá's kīh yuhwa yajkxmée mfxi'zewe luuçx le'çxkuē na'wě. Nawa jxpa'yakx fxi'zewa'j yu's thē'jsa na'wě ew yajkxna mfxi'zewe. ²¹ Yuwe fxiysaju we'weni' thaakwe selpiwa'jme's Dxus librute na'jī'k: Vxite ajūwe'sxtxi kwe'we'je'nja yuwe jiyunimeesaju naa nasatx pta'sxna. Nawa makwe txã'wě yūutewa, nwēese'jmeetxna jī'k. ²² Txã'wě yuwe jiyunimeesaju we'wenisa' Dxusa's weeçxsawe'sx Dxus ũsyuhna sūhna kaayaki'jwa'jsaçxá', sa' Dxusa's jiiyã'jsawe'sx

jīi me'. Naapkaçxha' Dxus we'weni's pta'sxya' ãjanisa', Dxusa's jiisa ũstxna txãawe'sx jīiçxá'. Dxusa's weeçxsawe'sx jīi me'.

Kīh yūuççxawa teeçx teeçxçxah we'wewa'ja'

²³ Txãa pa'ga Dxus luuçx jxukaysa pkhaakheçxa kxazīi yuwe fxiysa yakh susna ũste', maaīi yu' Dxus Espiritu kwe'we'jnitewa jiimeesa kūhçxa', luuku yuuna ũsta' çjīmeema'k? ²⁴ Nawa jxukaysa Dxus we'weni's ãate pta'sxna ũsune'kwe aça' maaīi yu' ekajuwe'sx kūhçxa ũssa' jiyuna txajx pkalte fxi'zena ũsni's, i'kwe'sx txã'wē Dxus we'weni's ãate pta'sxna ũspa'ga. ²⁵ Txãa pa'gatey i'kwe'sx ãate we'weni' txajx ũus yaakxnitxi' kpaakitxna, aça' kīiçhuçxa Dxusa's na'jīna weçxaana: Dxusa' isa i'kwe'sx yakh yuh ũsu'ga jīna.

²⁶ Txã'wē yã'the', na'wē myūuwe yakhthē'jwe'sx: i'kwe'sx yakh pkhaakhena ũssa maaīi yu' Dxusa's weçxana memwa'j wáa ji'phtxna, vxite' kaapiya'jwa'j wáa ji'phtxna, meeçxawa Dxus we'weni's wáa kaajiyu'jwa'j ji'phtxna. Naapkaçxha' vxite' yuwe fxiysaju wáa Dxusa's weçxawa'j ji'phtxna, meeçxa' txãa yuwe fxiysaju we'weni's wáa ãate pta'sxwa'jsa ũstxna, aça' txã'wē yūutewa, ew yuhna Dxus luuçxtxi selpiwa'jsate yu'. ²⁷ Yuwe fxiysaju we'weççxa', e'z meeçxa' tekh kxazçxáa we'wewa'ja' teeçx teeçxçxah. Nawa txãa yuwe fxiysaju we'wenisa's ãate kaajiyu'jwa'jsa ũsteçxáa txã'wē yūuwa'ja'. ²⁸ Nawa ãate kaajiyu'jwa'jsa kimwa meete', yuwe fxiysaju kuçx we'wenuwe txãa pkhaakhenite. Kxãanpasa' yuwe fxiysaju

Dxusa's weçxa wējeçça', iidx ũusteçxáa weçxana mneeýũu. ²⁹ Meeçxa' Dxus we'weni's pta'sxwa'j wáa yuuna nawa e'z tekh kxazçxáa mwe'wewe, naapkaçxha' wēse'jna u'psa' jxpa'yakx wēse'jetxna Dxus we'wenitewa jiyuya'. ³⁰ Meeçxawa wēse'jna u'psa's Dxus we'wewáana pta'sxkahn, aça' yaçte we'wesa jxã'jpkçaçx ũythasçxa we'wewa'ja'. ³¹ Txã'wē Dxus we'weni's jxpa'gasa' jxukay pta'sxya' ájane'kwe, nawa vxite we'wena jxã'jpkçaçx ũythasçxa teeçx teeçxçxah. Txã'wē yũute', jxukaysa piyaçxa Dxus dxi'pte wejx çxhãçxha fxi'zene'kwe. ³² Txãa pa'gatey Dxus we'weni's jxpa'gasawe'sxa' txãawe'sx ũus yaakxni's jxpa'yakxwa'ja', ma'wēwa ũusutheni's we'wemée. ³³ Txã'wēme', Dxusa' txã'wē kaypuba'jna susna ũswa'jsame'. Ma'wēta Dxusa's yaakxsa msuuwe'sxwa susmée fxi'ze', txã'wēy fxi'zewa'ja'.

³⁴ U'ywe'sxa' pkhaakhena ũsni kultote' paapējxna susna ũswa'j ji'phmeeta'. Txã'wē yũumée, jxpa'yakx wēse'jwa'j ji'phta' kulto ki'puçte', Dxus ley ma'wē jxkaathe' kxtey yuuna. ³⁵ Kĩh paapēywa'j ji'phçxa', yat-su pa'jçxa txãawe'sx nmi'tx pēyitxna. Weh yuhwa ewme' u'ywe'sx txã'wē kultote susna ũste'.

³⁶ I'kwe'sxa' iwejçx yajkxna ma'wēwa yuuwa'j ji'phmeei'kwe. Txã'wē yuukahmeni Dxus yuwe' i'kwe'sx tasxu nyafxçxah kasehme', aça' i'kwe'sxçxáa Dxus yuwe's jiisa ũsmeei'kwe. ³⁷ Na'wē we'wena fxi'jaçthu txã' Dxus jxkaahnita', aça' Dxus we'weni's jiyusa ũswá'kwe meeçxa' Dxus Espiritu

kaaũusuthe'jni's jxpa'gasa ũşça', peekx mjiyuwe. ³⁸ Nawa txã'wẽ jxkaahna fxi'jnitxi' kxtey nwẽese'jmeena aça' txãa nwẽese'jsame's jxpa'gameete ewna.

³⁹ Yakhthẽ'jwe'sx, na'wẽ myũuwe: Dxus we'weni's ãate pta'sxwa'jçxá's wejx miijajkxwe. Nawa yuwe fxiysaju we'weni's yup yu' meeçxawa, ⁴⁰ kultote kĩhwa susmée zhiçxkwe teeçx teeçxçxah we'wena meswe.

15

Jesukristo ki' itxi yuuni

¹ ãçha' na'wẽ Kristo yuwe ewte nvxiitwa'jsa's pta'sxthu txã' ma'wẽsatewa ew kaajiya'jya'wath yakhthẽ'jwe'sxtxi. I'kwe'sxa' txãa pta'sxni's jxpa'gaçxa txãajũ txutemée ũsi'kwe. ² Txãa Kristo yuwe ewsapa'ga i'kwe'sxa' nwe'weni ewte neeyũuwa'jsai'kwe, adx pta'sxni's kxul-teçxáamée ũusuh jxuka jxpa'gaçxa yu'.

³ Kristo yuwe ewte nvxiitwa'jsa jĩni's adxna ma'wẽ kaapiya'the' i'kwe'sxtxiwa txã'wẽyçxáath kaapiya'j txã' na'wẽk yu': Dxus librute ma'wẽne' fxi'jni ũsu' aça' txã'sa' kxtey yuuna Kristo' kwe'sx pkalsa pa'gate uuk. ⁴ Txajũ' pedaniik yuu nawa tekh ente' ki' itxi yuuk, Dxus librute ma'wẽne' fxi'jni ũsu' txã'wẽy. ⁵ Ki' itxi yuuçxa', Pedro's vxyaak. Txajũ' vxite txajx jxkaahnisa docesatxwa vxyaak. ⁶ Txãa e'su' yakhthẽ'jwe'sx kinientos thaakwetx ũsu' teeçx ahte txãatxwa vxyaak, aça' txã'wẽ uysá' wala kuh nee itxiyta' makwe vxite' yu' uutewa. ⁷ Txãa

e'su ki' vxyaaçxa', Jakobo'sku vxyaa, sa' txajx jxkaahnisatxwa ki' vxyaak jxukaysatx.

⁸ Nmehte' adxnawa vxyaak, adxa' en ähmey upxsa seelpimeesa na'wēsatewa. ⁹ Txāasa adxa' Jesus jxkaahnisatewe'sx vxite yakh yu', wala ähmeekwesath, sa' Jesus jxkaahnisa na'wē yuuwa ya'kxsuswa'jmeesath, txā'wē Dxus luuçxtxith aḥçena fxi'ze naa pa'ga. ¹⁰ Makwe txā'wēsatewa, Dxusa' adxa's peeygāhçxa txhitxhku txajx peeygāani' kxul yuume' adx yakh. Txā'wēsaçxawa adxthu vxitesate wejx jxthaakwe mjīi. Nawa ew yajkxte yu' txā' adxçxāa mjīinisa yu'çme', Dxusku adxa's peeygāhçxa txutemée ūsu' txāa pa'gaçxāath txā'wē mjīi. ¹¹ Nawa txāa yu' kīh yuumeena, Jesus jxkaahnisawe'sx ma'tx jxthaakwe mjīi, meeçxa' adx ma'th jxthaakwe mjīi. Nawa jxukaysa fxiymée txā'wēçxaçxāatha'w Kristo nwe'wewa'ja's pta'sxi', aça' txā'sna i'kwe i'kwe'sxa' ūuste jxpa'ga.

Uusaawe'sx ki' itxi yuuwa'j

¹² Kwe'sx pta'sxni' Kristo itxi yuuni'sku kaajiyu'jni yuu aça' i'kwe'sx yakh ūssa maaii yu' çma'wēta uusaawe'sxa' itxi yuuwa'jsameeta' jīna we'we'? ¹³ Uusaawe'sx itxi yuuwa'jsameete', Kristowa itxi yuumeene'ga. ¹⁴ Kristo itxi yuumeete', kwe'sx pta'sxni' kxul yuhna, aça' Kristo' kwe'sxtxi nwe'wesa' sūhna i'kwe'sx yaakxnisawa kxul yuhna. ¹⁵ Txā'wē Kristo' itxi yuumée wá' aça' kwe'sxa' Dxus dxi'pte i'sxiisa yu'nja'w, Dxusa' Kristo's itxi vxitku jīna pta'sxpa'ga. Txā'wē uusaawe'sx

ĩtxi yuuwa'jsameete', Dxuswa Kristo's ĩtxi vxitmeene'ga. ¹⁶ Na'jĩ'th na': uusaawe'sx ĩtxi yuuwa'jsameete', Kristowa ĩtxi yuumeene'ga. ¹⁷ Sa' Kristo ĩtxi yuumeete', i'kwe'sx ũuste yajkxçxa Kristo' kwe'sxtxi nwe'wesa' sũhnisa' kxul yuh yuune', aç'a' i'kwe'sx pkala' açxpkaçx Dxus peltunãynimée ũstxna. ¹⁸ Txã'wě ĩtxi yuumée wá' aç'a' Kristo's ũuste jxpa'gaçxa uusaawe'sxa' vxitune'ta. ¹⁹ Kristo yakh fxi'zeni' naa kiweteçxáa selpiwa'jsate', maatewa jxthaakwe kxulsa' kwe'sx ne'tka'w.

²⁰ Nawa txã'wěme'. Kristo' ĩtxi yuuyujk. Uusaawe'sx nyafxte ĩtxi yuusa' txãak yu'. ²¹ Ma'wěga naa kiwete uuwa'jwa teeçx nasate takh, txã'wěy uuçxa ki' ĩtxi yuuwa'jwa teeçx nasatek takh. ²² Teeçxsa Adanpa'gaçxáa jxukaysatx uuwa'ja's ji'phu, txã'wěy teeçxsa Kristopa'gaçxáa jxukaysatx ki' ĩtxi yuuwa'ja'swa ji'phu. ²³ Nawa txãawe'sx ĩtxi yuuwa'j en ähte fxiifxiiçxah ĩtxi yuutxna. Nyafxte' Kristo khuě'yku yaçte ĩtxi yuu. Txãa e'suh Kristo ki' kũijana naapkaçx Kristo's jxpa'gaçxa uusaawe'sx ĩtxi yuutxna. ²⁴ Txãa e'su nmehsa pa'jana, txajũ Kristo' naa kiwetewe'sx vxite' cielutewe'sx ma'tx yuu nawa kĩh yuhwa nvxihtmée jxuka kaapçu'ju'jçxa txajx jxkaahni's jxuka dukhena Neyá's, txãa yuuçxáa jxkaakhan. ²⁵ Nawa txã'wě yuumey yu' Kristo khuě'y jxkaahwa'jsa', txã'wě Dxusa' açesa jxukaysatx Kristoçxaçxá's nwěese'jwa'ja's vxitpkaçx. ²⁶ Txã'wě jxukaysatx Kristoçxaçxá's nwěese'jwa'ja's vxitçxa, nmehte' uuwa'ja'swa Dxusa' ivxiituna. ²⁷ Dxus librute

we'weçxa': Jxukaysa Kristo's nwēese'jwa'jsata' jī'k aça' Dxuswa Kristo jxkaahni yuuna sūjuwá'kwe, nawa txā'wēme'. ²⁸ Açesa jxukaysa Kristoçxaçxá's nwēese'jeçpkaçxha', Dxus Nçxi'k Kristoiwa Ney tasxte nwēese'jya' ya'dukhena Ney makwe ne' ūs petx txāa yā'jçxa jxuka. Txā'wē yūute, Dxusa' txāaçxaçxáa jxkaajana.

²⁹ Txā'wē uusaawe'sx itxi yuuwa'jsameete', ¿kījxa'çxáata txā'wē ya'bautisaī' itxi yuuwa'ja's yajkçxa?

³⁰ Txā'wē itxi yuuwa'jmeete', kwe'sxa' ¿kījxa'çxáatka'w een isa ikh wēeni fxi'ze', itxi yuuwa'ja's pta'sxna kxulteçxáa? ³¹ Adxa' txā'wē yuh een isa ikh wēeni fxi'ze'th txā' īsxiinime'. Nawa, yakthē'jwe'sx, Jesukristo's ūuste ji'phi'kwe txāa pa'gaçxáath txā'wē yu' weçxana. ³² Efxesotewe'sxa' yu'kh eçx na'wē seena' weesweesata' jī'tx txāawe'sx yakh iipuiith. Nawa adxa' ¿kīh yūuçxatka uuwa'ja's ūukhu'çmée? Txā'wē uuyā'jçxa' peena yu' itxi yuuwa'jmée dxihte', isa yuh we'we'ne'ta na'wē we'wesa': Ū'na tudxna fxi'zega, uuçxa kxtee pçuwa'jsaçxáatha'w jīsa'.

³³ Txā'wē itxi yuuwa'jme' jīni's txā'wē dxihna sūhna jxpubanuwe. Txā'wēme', namikuwe'sx ewmeesa' kaypuba'jatxna ew fxi'zesa's jī'tx txā' kxtey yuuna. ³⁴ I'kwe'sxa' jxpubamée fxi'zenite sxawedçxa, peena yu' pkalte fxi'zenuwe. Txā'wē yūumeeçxa' i'kwe'sx maai' yu' āçxpa'jwa Dxusa's jūimeei'kwe. Txā'wēth āate we'we' thaameçxa jxpa'yakx fxi'zekahn.

¿Uusáa ki' itxi yuuwa'ja' ma'wēkx?

³⁵ Nawa maai' yu' pēyiwaatxna na'jīna: Uusáa ki' itxi yuwa'ja' ¿ma'wēkx? Kakwe ¿ma'wēsa ji'phutxki? jītxna. ³⁶ Jiyuya' āja'çmeewá'kwe. I'kwe'sxa' peekx jiine'kwe kīh nxinxa'swa uuhte', txāa nxinx kajkwekhēwe'sxa' çxibi'k, naapkaçxha' dxiitewe'sx ũusçxáak buçxá'. ³⁷ Skuutxh nxinx ma'k yuu meeçxa' fxtūu nxinx ma'k yuu nawa uuhte' txāa nxinxíçxáa āate kāawa'jsame', txāa nxinxte ũusçxáa buçxawa'jsa'. ³⁸ Aça' txāa nxinxuh buçxasa' kakwe ma'wēsaçxah ji'phuwa'jsatewa txā'wēsak Dxusa' ũsu', kīh nxinxtewa txāa iisa fxiyfxiyçxah. ³⁹ Txajíi kakwe ma'wēsawa ũsta', nawa txā'wēçxaçxáa meeta'. Nasaa kakwe' fxiyta', aça' niimal kakwewa fxiyta'. Txā'wēy fxuusáa kakwewa fxiyta', aça' yu'gawe'sx wedx kakwewa fxiyta'. ⁴⁰ Txā'wēy ēe walatewa ũsta', naapkaçxha' naa kiwetewa ũsta'. Nawa ēe walatewe'sxa' fxiy zhiçxkweta' naa kiwetewe'sxte. ⁴¹ Sek kweethni vxite' a'te kweethniwa fxiyta'. Txā'wēy estrelxa kweethni vxite' sek kweethniwa fxiyta'. Sa' estrelxa pwe'sx kweethniwa puutx fxiyçxaçxáata'.

⁴² Txā'wēy kwe'sx kakwewa fxiy yuwa'jsa' ki' itxi yuunijū'. Uute', kakwe pçuwa'jsa's ya'peda'k, naapkaçxha' txāa pedaniijū ki' itxi yu'k peena yu' uuwa'jmée kakwe yakh. ⁴³ Kakwe kazxsa's ya'peda'k, nawa txajū ki' itxi yuuçxa', seena' zhiçxkwesak yu'. Kakwe selpimeesa'sku ya'peda', nawa txāajū ki' itxi yuuçxa bagaçxte yuhwa pçumée selpiwa'jsak yu'. ⁴⁴ Naa kiwete fxi'zeni kakwe' vxite', aça' Dxus tasxte fxi'zewa'j kakwewa vxite'. Txāa pa'ga kakwe

naa kiwetewe'sxa's ya'peda'k, naapkaçxha' ki' ïtxi yuusáa kakwe' Dxus tasxte ũswa'jsa'.

⁴⁵ Txajjik Dxus librute we'weçxa': Nyafxte piçthē'j Adana' naa kiwete ïtxi fxi'zewa'ja'sçxáak ji'phu' jĩ'. Nawa nmehtewe'sx Adana' pçumée ïtxi fxi'zewa'ja's peessa'. ⁴⁶ Nawa nyafxte kakwe' Dxus tasxte fxi'zewa'jsa yu'çme'. Nyafxte'we'sxa' naa kiwete fxi'zeni kakweçxáak yu', naapkaçxha' nmehte kakwe' Dxus tasxte fxi'zewa'jsa'. ⁴⁷ Nyafxte piçthē'j Adana' kiwe'sku pheu'jnisa yu' naa kiwetewe'sx, naapkaçxha' e'stewe'sxa' Kristok yu' cielujūwe'sx. ⁴⁸ Naa kiwete jxukaysa nasaa kakwe' nyafxte Adan kakwewa ma'wēga kiwe yu', txã'wēysa i'çxáata', naapkaçxha' cielute ũswa'jsa kakwe' cielujūwe'sx kakwe na'wēy yuuwa'jsa'. ⁴⁹ Ma'wētk'a'w a'çxwa nyafxte Adan kakwe's i'çxáa ji'phuya' āja', txã'wēy Kristo kakwe's i'çxáa ji'phuya' āja'nja'w txã'wē yuuwa'j en āhte'.

⁵⁰ Yakhthē'jwe'sx, i'kwe'sxtxi āateth pta'sxi': Naa kakwe yakha' cielute Dxus jxkaahnite u'kaya' ya'ājameena. Naa kiwete pçuwa'jsa' çma'wē багаçxte yuhwa pçuwa'jmée ïtxi fxi'zenite ũsya' ājakx?

⁵¹ Āçxha' pta'sx ya'wath: Maaíi yu' nee uumée ũssa' naa dudte korneta tukani nmeh susuçpkaçxha', naa kakwe's yu'pthehni yuuçxa vxite kakwe jxpa'ga'nja'w jxukaysa. ⁵² Txã'wē korneta susuçpkaçxha', uusaawe'sxa' ki' ïtxi yuutxna peena yu' uuya'mée, naapkaçxha' naa dudte yaakxni yuumeete nee uumée ïtxi ũssa kakwe' yu'pthehni yuutxna. ⁵³ Txãa pa'gatey kakwe pçuusáa uuniijū' vxite kakwe

bagaçxte yuhwa pçuwa'jmeesa's jxpa'gawa'j ji'pha'. Sa' kwe'sx kakwe uuwa'jsa's yu'pthexça bagaçxte yuhwa uuwa'jmeesa's jxpa'gawa'ja'.
⁵⁴ Txã'wê kakwe pçuusá' vxite kakwe bagaçxte yuhwa pçuwa'jmeesa's jxpa'gaçxa kwe'sx kakwe uuwa'jsa's yu'pthexça bagaçxte yuhwa uuwa'jmeesa's jxpa'ganijũ' Dxus librute we'weçxa': Uuwa'ja's ivxiitunik yuu, peena yu' uu en pa'khamen jĩ'k txã' kxtey yuuna.
⁵⁵ Uuwa'ja' bagaçxte yuhwa mee yuukahn jxuka ivxiitute', ¿ma'wê uuwa'j en pa'ja'kx uuwa'ja's ji'phuwa'jsamée yã'jsa's? ⁵⁶ Uuwa'j ena' pkalpa'gaçxáak pa'j, açá' txãa pkala's kçxhãaçxa'jsa' nyafxíi leyku txã'wê yuu.
⁵⁷ Txã'wêtewa, Dxus txakwe ewte kwe'sxtxi jxpe'jsa Jesukristo pu'çxpa'ga uuwa'ja's peena yu' ji'phuwa'jsameetha'w.

⁵⁸ Txãa pa'ga adx yakthê'jwe'sx, bagaçxte yuhwa pu'vxitumée Dxus yakh mfxi'zewe, Jesukristo's jwee íçxáa çxhãçxha selpiina, txãa pa'gatey Jesukristo's selpinisa' kxulsame'.

16

Yakthê'jwe'sxtxi pu'çxwa'j vxyu pkhakhni

¹ Nyafxíi Galaciate ũsçxa', Dxus luuçxtxi kaapiya'th Dxus yakh fxi'zesatx pu'çxwa'j ma'wê vxyu's pkhakhwa'ja'swa açá' txã'sa' kxtey myũuwe. ² Ki'sen iisa teeçxsa na'wêçxah i'kwe'sx ji'phuni's makwe ũswa'ja'swa txuhdeçxa jxaawna me'jwe, adx pa'the pkhakhna ũsya'mée. ³ Kxte adx pa'jçxa' txãa pkhakhni vxyu'sa' Jerusalenna kaja'nja,

aça' u'jwa'jsa pakweene'kwe txãawe'sxtxi karta ũsu'nja, Jerusamente yakhthê'jwe'sxtxi dukhkahn petx txãa vxyu yã'jçxa. ⁴ Meeçxa' adx yuu wáa u'jwa'j kasejena aç'a' u'jwe'nja, nawa txãawe'sxwa adx yakh pi'kxna yuweetxna.

Pablo u'jya' yaakxni

⁵ Adxa' yuhçxa', Macedonia kiwey uykhêwna yuwe'nja i'kwe'sx tasxte pa'jya'. ⁶ Kxte pa'jçxa' maz en jxthêyuuwá'nja meeçxa' nus en skhêwpkaçx. Aç'a' i'kwe'sxa' pu'çxhine'kwe txãajũ adx ki' u'jwa'ja's. ⁷ Dudteçxáa i'kwe'sx yakh puutx uyya' yuu wêje'çmeeth. Kxte txaçxthu ũs wêje' i'kwe'sx yakh, Dxus txã'wê wedxwaça'. ⁸ Nawa ayte Efxesote nee ũsya'wath, Pentekostes fxiesta skhêwpkaçx. ⁹ Txã'wê açesa ũstewa, Dxus jĩi mjĩiwa'j wala ew yuuça' naa pa'ga txã'sa' ivxiitume'nja sũju'th.

¹⁰ Timoteo pa'jawáana aç'a' mpu'çxwe, kĩhtewa nxusmêe wêt i'kwe'sx yakh ũskahn. Txã'wême', txãawa adx na'wêyçxáa Jesukristo's selpisá'. ¹¹ Txãa pa'ga kimwa açenuwe, wejxwa mpu'çxwe dxi'the peejxmêe yuuwa'ja's, kxah adx tasxte ki' sxawedna pa'jya' ãjana. Txã'wême', adxa' Timoteo's ũythasna ũsthu ayte yakhthê'jwe'sx yakh.

¹² Apolosa's wala pxthaa we'weth yakhthê'jwe'sx yakh i'kwe'sxtxi puutx uyya' u'khan. Nawa açxhíi yu' duduuçme', sa' maa ente u'jwa'j kasehteçxáawa yuweena.

Yuwe weçxaa kaahnitx pta'sxna fxi'jni

¹³ Jxpa'yakx çxhãçxha mfxi'zewe, Dxus yuuçxá's ũuste peçxkanamée yajkxna. ¹⁴ Kĩh yũuççxawa peeygãawa'ja's yuuçxáa yajkxna txã'wē myũuwe.

¹⁵ Yakthē'jwe'sx, jiine'kwe Akaya kiwete nyafxçxah Kristo yuwe ewsa's jxpa'gasa' Estefx-
anaswe'sxta', sa' txãawe'sxa' wala selpiitx Dxus
tasxte utxasaawe'sxtxi pu'çxna. ¹⁶ Aça' i'kwe'sxa'
peeygãawa'j ji'phi'kwe txãawe'sxtxi's meeçxa'
maawa txãawe'sx na'wēy pu'çxna selpisaatx.

¹⁷ Adxa' wala weçxa'th, Estéfxanas, Fxortunato,
Akáiko txãawe'sx ayte pa'pha'ga. I'kwe'sxa'
ayte adx yakh ũsmeeçxa', adxa's pu'çxya'
ãja'çmeei'kwe. ¹⁸ Nawa txãawe'sxa' adxa's
kçxhãaçxha'jtx Dxus yakh weçxana fxi'zewa'ja's,
sa' i'kwe'sxtxiwa txã'wēy ne'ta yuu. Aça' nasa
txãawe'sx na'wēysatxi' peeygãawa'ja'.

¹⁹ Dxus yakh fxi'zesawe'sxa' Asia kiwete yuwe
weçxaa kaja'tx. Txã'wēy Akila ptamwa yuwe
weçxaa kaja'tx, kxtee pkhaakhesawe'sx yã'jçxa.

²⁰ Yakthē'jwe'sx jxukaysa yuwe weçxaa
kaahni's mpa'gawe, sa' teeçxsa na'wēçxah puutx
mwēeçxawe.

²¹ Pablo yaasesath adx kuseju fxi'ja' i'kwe'sxtxi
weçxana. ²² Maaí yu' Jesukristo's açesa
ũswáatxna, açá' txãawe'sxtxi' Dxus kastigote
ivxiituwa'j yuutxna. Kwe'sxtxi jxpe'jsa Jesukristo
dud kĩhwaça' sũju'th.

²³ Jesukristo' i'kwe'sxtxi bedekĩina. ²⁴ I'kwe'sx
jxukaysatxthu adx peeygãani's kaja', Jesukristo's
neewe'wena.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

06da09f4-8d0f-5001-ae8c-0e6aa0131ffd